

增订南诏野史 [明] 杨慎辑 [清] 胡蔚订正

增订南诏野史上卷

明四川新都杨 慎升庵编辑  
大清湖南武陵胡 蔚羨门订正

南诏之称

蛮夷称王曰诏。先时滇有六诏，各据其地。六诏中蒙舍诏最强，后并吞五诏，故独称南诏。

六诏考【六诏之地，东西四千里，南北二千九百里。】

蒙舍诏。【蒙细奴罗立国，居蒙舍川，地在永昌、姚州之间，处五诏之南。后奴逻曾孙皮逻阁并吞五诏，独称南诏。今蒙化厅是。】  
濛賧诏。【丰咩立国，居邓川。今大理府邓川州是。】  
施浪诏。【施望欠立国。居浪穹弥茨河蒙次和山，今大理府浪穹县是。】  
浪穹诏。【丰时立国，居浪穹。后其孙铎罗望迁剑川，改称剑浪诏。今丽江府属剑川州地是。】  
越析诏。【波冲立国。亦称摩诏。又号花马国。居嵩州。今丽江府是。后，其兄之子于赠渡泸，邑于龙佑河。】  
蒙嵩诏。【嵩辅立国。居越嵩，今四川宁远府，越嵩厅是。】

南诏分野

在天井鬼入参一度，『汉书』。次鹑首末位『晋书』。丽中台上位北斗开阳一星。『宋书』。在地乃梁州裔土，蜀之苑囿。『河图纬』。

南诏历代称名不同

周鄯阐国、白崖国、昆弥国。战国时滇国，汉西南夷、益州、白子国。后汉建宁国。晋、宋、齐、梁、陈，宁州。隋昆州。唐初，南宁、六诏，唐文宗太和间，名鄯阐府。宋仍名南诏。元名中庆。明名云南省。国朝因之。按：汉武帝元狩元年，彩云见南中，在今大理府赵州之白崖。云南之名始此。唐元宗（间）〔问〕蒙舍诏盛逻皮之相张建一作俭成住何处？曰：「南边云下。」因命为云南。又元宗见祥云起，名祥州。今大理府之云南县也。

南诏历代据土总纲

鄯阐国蒙苴颂，昆弥国庄躄、仁果、龙佑那据于周、秦、汉迄六朝。细奴逻据于唐。郑买嗣、赵善政、杨于贞、段思平、高升泰暨正淳，相继据于唐末迄南宋。凡历有九姓，而雍闾、孟获不与焉。段氏与南宋理宗壬子淳佑十三年为蒙古所灭，而段实于理宗景定二年袭总管，传十二世，明太祖壬戌洪武十五年平云南，擒段世，并段段明之二子苴仁、苴义。赐苴仁官雁门卫镇抚，苴义官武昌卫镇抚，段氏之世土方绝，而又别封其族人段保为大理府云龙州土知州。国朝尚有袭土职者。

## 南诏称谓官制

南诏称帝曰骠信，王曰诏，自称曰元，称后曰信么，亦曰九么，妃曰进武，兄曰容，弟曰钟，下曰昶。其设官则有把国事八人，曰坦绰，曰布燮，曰九赞，谓之清平官。曰酋望，曰正酋望，曰员外酋望，曰大（将军）〔军将〕，曰员外。又设九爽之名，爽，省也。功爽主官人，宗爽主户籍，万爽主财用，慈爽主礼，引爽主宾客，幕爽主兵，罚爽主刑，厥爽主工作，禾爽主商贾，皆清平官、酋望、大军将兼之。以清平官子弟为羽仪长八人，清平官见王不得佩剑，惟羽仪长佩之。又有六曹长二人，曹长有功升大军将，凡十二人。又立三托：巨托主仓廩，气托主马，禄托主牛。大府主将曰演习，副曰演览；中府主将曰缮裔，副曰缮览；下府主将曰澹酋，副曰澹览；小府王将曰幕撝，副曰幕览。每府有陀酋，陀酋即掌书记判官之类。外有八节度使：曰弄栋节度使，【今楚雄府姚州。】曰银生节度使，【今景东厅及镇沅州地是。】曰永昌节度使，【今永昌府是。】曰丽水节度使，【今丽江府是。】曰剑川节度使，【今丽江府剑川州是。】曰东川节度使，【今东川府是。】曰通海节度使，【今临安府通海县是。】曰拓东节度使。【今云南府昆阳州北平定乡，蒙氏子凤伽异曾筑城于此地。】又有二都督：曰会川都督，【今四川宁远府会理州地是。】曰通海都督。又设十睑，【蛮语谓州为睑。】苴【音斜。】羊睑，【又名羊睑，即今大理府太和县。】赵州睑，【今大理府赵州。】白崖睑，又名勃弄睑，【今赵州之白崖。】云南睑，【今大理府云南县。】蒙舍睑，【今蒙化厅。】大厘睑，【又名史睑，今太和县喜州。】遵川睑，【今大理府邓川州。】品澹睑，蒙秦睑，矣和睑。【三睑未详其地。○蔚按：别本十睑中苴羊睑、赵州睑、白崖睑而下，作义督睑，今剑川州；威远睑，今普洱府威远厅南；河东睑，未详其地；越睑，今永昌府腾越州；北方睑，又名成偈睑，今永北厅；楼头睑，今四川叙永厅，属永宁县；路睑，今楚雄府广通县；与云南睑以下七睑异。○按：又考此七睑中，其越睑、北方睑、楼头睑、路睑凡四睑，见于『汉地里志』及『唐书?南蛮传』中，睑并作啖，音闪，字既不同，音又各异，似非列于十睑之数。】凡人丁壮者皆为战卒。王之亲兵曰朱弩佉苴，【音蛆。按：元微之白乐天乐府皆作法嗟，未审孰是。】佉苴，韦带也。每兵百人置罗苴子统一人，戴朱鞞鍪，负犀革铜盾而跣足。自大军将以至曹长，皆系金佉苴尚绛紫，有功加锦，又有功加金波罗。即虎皮。民兵号白衣，凡民兵出以望苴蛮为先驱。

## 南诏三十七蛮部

因远部。【威远睑治，其地总名和泥，今元江府是。】休腊部。【今临安府河西县。】嶧峨部。【今临安府嶧峨县。】屈中部。【今临安府阿迷州。】溪处

甸部、伴溪落恐部。【今俱为长官司，属临安府。】铁容甸部。【今为亏容长官司。】官桂思陀部。【今为思陀甸长官司，皆属临安府。】王弄部、强现三部。【今属开化府。】师宗部。【今广西州师安县。】弥勒部。【今广西州弥勒县。】吉输部、褒恶部。【俱在弥勒县地。】维摩部。【即广西府维摩州。州裁，今属广西州地。】罗雄部。【今曲靖府罗平州。】纳垢州。【今曲靖府马龙州。】落温部。【今曲靖府陆凉州】。磨弥部。【今曲靖府沾益州。】仁德部。【今曲靖府寻甸州。】夜苴部【即曲靖府亦佐县，县裁，今归罗平州。】强宗部。【即澄江府阳宗县，县裁，今归河阳县。】步雄部。【今澄江府江川县。】罗伽部。【即步雄部分地。】休制部。【今澄江府新兴州。】落蒙州。【今澄江府路南州。】弥沙部、邑市部。【皆落蒙部子孙分治之。】阳城堡部。【今云南府晋宁州。】罗部。【今云南府罗次县。】干矢部、罗婺部。【俱在武定府曲州，州裁，今属武定州。】华竹部。【今武定州元谋县。】洪农碌券部。【今武定州禄劝县。】掌鸠法块部【在禄劝县城东五里。○以上三十五部在迤东地。】白鹿部。【今楚雄府。】谋统部。【今丽江府鹤庆州。○以上二部在迤西地。】

### 南诏历代

白古记：西天天竺摩竭国阿育王骠苴音斜。低娶欠蒙亏为妻，生低蒙苴。苴生九子，长子蒙苴，附罗十六国之祖；次子蒙苴廉，吐蕃之祖；三子蒙苴诺，汉人之祖；四子蒙苴酬，东蛮之祖；五子蒙苴笃，生十二子，七圣五贤，蒙氏之祖；六子蒙苴托，狮子国之祖；七子蒙苴林，交趾国之祖；八子蒙苴颂，白子国仁果之祖；九子蒙苴闾，初六切。白夷之祖。○『哀牢【今永昌府。】夷传』：哀牢蛮蒙伽独捕鱼易罗池【在永昌府城南。】溺死。其妻沙壹【一作壶。】往哭之水边，触一浮木，有感而妊，产十子。后携子至池上，木化为龙，人言曰：「我子安在？」九子惊走，独季子背龙而坐，龙舐其背。蛮语谓背为九，坐为隆，故名之曰九隆氏。哀牢山【一名天井山，在永昌府。】下有妇名奴波息，生十女，九隆弟兄娶之，立为十姓：董、洪、段、施、何、王、张、杨、李、赵，皆刻画其身象龙文，于衣后着尾。子孙繁衍，居九龙山【山在永昌府城南。】溪谷间，分九十九部，而南诏出焉。

### 鄯阐国

周时立国，年代久远，其姓名世次莫考。

### 白崖国

西天天竺摩竭国阿育王低蒙苴第八子，蒙苴颂居白崖，因地名，号白崖国，传世莫考。后昆弥氏继之，号昆弥国。

昆弥国【一名拜国。】

昆弥氏，传世姓名莫考。战国时，楚将庄蹻据滇，并有其地，号滇国。

### 滇国

战国时，楚顷襄王命将庄蹻【范蔚宗后汉书作庄豪。】将兵循江上，略巴、蜀、黔中以西，蹻至以兵威畧定滇地属楚。欲归报，会秦司马错攻楚，黔中道塞。蹻遂以其众王滇，号滇国，踞之。后有王常羌者好佛，国势不振。法令不行，国人遂推白崖国蒙苴颂之后，白饭王之裔仁果为王，治白崖，于是两国角立。后仁果奉汉，封为白子国。

### 白子国

汉武帝通西南夷，遣使至滇，求身毒国。滇王常羌问使者曰：「汉孰与我大？」使者还报，武帝怒其言不逊。时白崖国蒙苴颂之后，天竺国白饭王之裔仁果者，为众所推立于白崖。武帝乃册封仁果为王，号白子国。后迁于澄江，【今澄江府。】迨龙佑那继之，号建宁国。○又一说：白子国之先，有阿育国，王能乘云，上天娶天女，生三子，长季二子封于金马、碧鸡，独封仲子于苍洱之间，崇奉佛教，不茹荤，日食白饭，人因称为白饭王。迨后有仁果者，汉封为滇王，号白子国。又十五世至龙佑那，后汉诸葛武侯南征，次白崖，以佑那为酋长，赐姓张氏，仍统其民，号建宁国。

### 建宁国

后汉后皇帝乙巳建兴三年，益州耆帅雍闿，假鬼术杀建宁太守王昶，归东吴，吴王孙权以闿为永昌守。后汉诸葛武侯南征，至白崖，杀雍闿，擒孟获，乃封白子国王仁果十五世孙龙佑那为酋长，赐姓张氏，于白崖筑建宁城，【蔚按：建宁城废址在今大理府赵州之弥渡。】号建宁国，立铁柱【蔚按：今弥渡有铁柱宫，铁柱尚存。先为建宁国王张乐进求甫铸，后南诏蒙世隆复重铸，名曰天尊柱，高八尺。】并『南中纪功碑』，铭其背曰：「万岁之后胜我者过此」。迨至隋时，行军总管太平公史万岁征南宁夷爨翫，西破三十余部，至此，见其碑铭，命左右踏之。其碑跌，中复有志曰：「史万岁不应踏吾碑」。万岁惊异，复树碑，祭拜而去。后张龙佑那仍迁国澄江，传三十二世至十七世孙张乐进求，唐太宗己酉贞观二十三年封为首领大将军。后见蒙舍川蒙细奴罗有奇相，遂妻以女，逊国与之。奴罗自称奇嘉王，建号大蒙国，又称南诏。

以上六国年代久远，莫详世次，畧序其纲如此。南诏大蒙国而下目列之。

### 南诏大蒙国 传十三世

细奴【一作农。】逻【一作罗。】 伪谥高祖奇嘉王

细奴逻，又名独罗消，西天天竺摩竭国阿育王低蒙苴第五子蒙苴笃之三十六世孙。生有奇相。唐太宗贞观初，其父舍龙龙，又名龙伽独，将奴逻自哀牢避难至蒙舍川，耕于巍山。【今蒙化厅之巍宝山。】一日，有老僧，美髯，冠

赤莲冠，披袈裟，持钵至奴逻家乞食。时奴逻与子逻盛炎方耕巍山之下，其姑与妇将往馐。见僧乞食，遂食之。再炊往馐，僧坐不去。姑妇持饷中道，僧已在彼，复乞食，姑妇又食之。返而复炊，持馐至巍山，则见僧坐盘石上，前有青牛，左白象，右白马，上覆云气。云中二童子，一执铁杖于左，一执方金镜于右。姑妇惊喜，复以所饷供之。僧问何所愿？姑妇不知对。僧曰：「奕叶相承」。及趣奴逻等至，则但见一人持钵，坐五色云中，而盘石上惟余衣痕及牛象马之迹耳。奴逻素有祥异，会唐封首领大将军建宁国王张乐进求，以诸葛武侯所立白崖铁柱，岁久剥蚀重铸之。因社会祭柱，柱顶故有金镂鸟，忽能飞，集奴逻左肩，相诫勿动，八日乃去。众骇异，谓天意有属。进求遂妻以女，举国逊之。于唐太宗己酉，贞观二十三年即位，年三十二岁，建号大蒙国，称奇嘉王，据南诏。高宗庚戌永徽元年，建都蒙舍川，于巛{山于}山【在今蒙化厅西北三十五里。】筑巛{山于}城。永徽癸丑四年，遣逻盛炎入朝唐，诏授奴逻为巍州【今蒙化厅】刺史，赐以锦袍。大勃弄【今大理府赵州白崖。】酋杨承颠寇麻州，【在今曲靖府马龙州城北里许。】唐命郎州【唐贞观初，分牂牁郡北界置郎州，后改名播州，即今贵州遵义府。又有郎州，在今云南县地。】道行军总管赵孝祖讨之。孝祖先入小勃弄，【今云南县地。】酋长没盛迎战，孝祖斩之。进至大勃弄，攻其城，破之，擒杨承颠，改云南县为匡州，领勃弄、匡州二县。高宗显庆二年，凤鸣于浪穹罗浮山，乃改名为凤羽山，【在大理府浪穹县西南三十里，又名鸟吊山。见『水经注』。】封十二圣贤为十二山神。时澄江人波罗旁有经济才，用为文臣；郭郡矣素以勇略闻，用为武臣。又有杨波远者，相传为东汉时人，常骑三角青牛，号神明大士，能知盐泉，滇中盐泉多为波远所开创。奴逻在位，遵唐正朔。高宗甲戌上元元年，奴逻卒，在位二十六年，子逻盛炎立。

罗盛炎【又名逻晟。】 伪谥世宗兴宗王

罗盛炎。唐高宗甲戌上元元年即位，年四十岁，以张建成相。明年，盛炎临朝，元宗壬子先天元年，姚州蛮叛归吐蕃。唐命御史李知古讨之，筑城立州县。知古诛豪杰，掠子女，蛮怨，引土蕃，攻杀知古，于姚嵩路绝，而盛炎独奉唐正朔。是年，盛炎卒，在位三十九年，子盛逻皮立。

盛逻皮【石刻作诚乐魁】 封台登郡王 伪谥太宗威成王

盛逻皮，唐元宗壬子先天元年即位，年四十岁。明年为元宗癸丑开元元年，唐授逻皮为特进，封台登郡王，今四川宁远府冕宁县地。设官征商税。开元二年，遣张建成入朝于唐。立土主庙。开元九年，皮叛唐。开元十四年，立庙祀晋右将军王羲之为圣人。元宗戊辰开元十六年，逻皮卒，在位十六年，子皮逻阁立。

皮逻【一作罗】阁【石刻作归义王魁乐觉】封云南王。

皮逻阁，唐元宗戊辰开元十六年即位，年三十一岁。开元十八年，灭五诏，自称南诏王。先是，蒙氏恐三十七蛮部不服，选亲族为五诏。未几五诏抗命，逻阁遂赂剑南节度使王昱，求合六诏为一。昱奏于朝，许之。逻阁乃豫建松明大楼，祀祖于上。使人谕五诏曰：「六月二十四日乃星回节，【蔚按：『大理郡志』汉元封间，叶榆妇阿南者为酋长，曼阿娜之妻。娜为汉将郭世忠所杀，欲妻南。南曰：能从三事，当许汝。一作幕次祭故夫；一焚故夫衣，易君新衣；一令国人皆知我以礼嫁。忠如其言。明日，聚国人张松幕祭其夫。下置火，南藏刃出，俟火炽焚夫衣，即引（刀）[刃]自断其颈，仆火中，时六月二十五日也。国人哀之，故岁以是日燃炬吊之，名为星回节云。是又当为二十五日。】当祭祖，不赴者罪。」四诏听命。惟越析诏波冲之兄子于赠，远不赴会，而遼賧诏丰咩孙{走皮}逻遼之妻慈善者，止逻遼勿赴。遼不听。慈善不得已，以铁钏穿于遼臂而行。二十四日，逻遼及施浪诏施望欠弟施望千、浪穹诏丰时孙锋罗望、蒙嵩诏嵩辅子罗原皆至逻阁所。逻阁偕登楼祭祖，祭后享胙食生饮酒，迨晚，四诏尽醉。逻阁独下楼，焚钱遽纵火，火发，兵围之，四诏皆焚死。逻阁遣使至四诏所，报焚钱失火，四诏被焚，状令各诏收骨。四诏妻至，莫辨其骨。独慈善因铁钏得焉，携归葬之。逻阁既灭四诏，取各诏宫人，念慈善慧而甚美，遣兵围其城，迫取之。慈善曰：「吾岂忘夫事仇者？」闭城坚守，半月城中食尽，慈善度不能支，即自杀，时七月二十三日也。逻阁嘉其节，乃封赠为宁北妃，并旌其城曰德源城。【城废址在今大理府邓川州城东北二里许。】开元戊寅二十六年，逻阁破吐蕃及弥蛮，入朝，元宗礼之，加封为特进，云南王，越国公，开府仪同三司，赐名归义，并锦袍金钿带七事。王归国，以兵逐洱河蛮，筑太和城，【今大理府城南十五里太和村地是。】又筑大厘城【今大理府城北四十里喜州是。】守之，尽有云南之地。唐授王子阁逻凤右领军卫大将军兼阳瓜州刺史。开元二十七年，明矫叛，破剑川、浪穹、永昌。开元二十八年，王讨朋矫，平之。开元辛巳二十九年，王自蒙舍川迁居太和城，立龙首、【即今上关。】龙尾【即今下关。】二关。唐加阁逻凤为左领军卫大将军。元宗癸未天宝二年，筑羊苴咩城于太和城之北。【即今大理府城。】唐迁阁逻凤为左金吾卫大将军，寻拜特进都知兵马大将军。天宝甲申三载，西方进狮子皮。唐加阁逻凤为上柱国。天宝乙酉四载十月，城永昌。天宝丙戌五载，王遣孙凤伽异入唐，唐授伽异为鸿胪少卿，妻以宗室女，赐龟兹乐一部，元宗戊子天宝七载，王卒，在位二十年，子阁逻凤立。

阁罗凤【一作觉乐凤。按：『德化碑』云：「家居阁罗凤」，则是取地名以为名也。】袭封云南王，伪谥神武王。【始建元。】

阁罗凤，唐元宗天宝戊子七载即位，年三十六岁。唐遣中使黎敬义持节册凤袭封云南王，勅置阳瓜州于蒙舍川，加授凤伽异为上卿兼阳瓜州刺史，都知兵马大将军。天宝庚寅九载，王率妻子往谒都督李宓，过云南，太守张虔陀私之，又多征求。王表虔陀之罪，中官贾奇俊抑之，不得达。王复遣将军杨罗顛等连表控告。元宗仍不省。凤怒，遣大将军王毗双、罗时等发兵攻虔陀。虔陀饮鸩死；遂取姚州，并夷州三十二。获唐嵩州西泸令郑回以归，爱其才，用为清平官。天宝辛卯十载，唐命剑南节度使鲜于仲通将兵八万征云南。凤赴泸南【在楚雄府姚州之城北一百五十里。】谢罪，愿还所俘掠，请罢兵。仲通不许，分三道而进。仲通自南溪路，大将李暉自会同路，都督王知进自步头路。今临安府地。凤就安宁，再伸衷悃。

仲通不听，兵至曲州、靖州。【二州今为曲靖府地。】凤复遣首领杨子芬、参军江如之赍状，言若不罢兵，即当归吐蕃，恐云南非唐有。仲通终不许，囚其使，进薄白崖城。别遣大将王天运统师遶出点苍山后。凤遣凤伽异及大军将段俭魏迎山后师，自逆战于西洱河。唐兵大败，死者六万人，王天运战歿，仲通仅以身免。凤乃叛唐，建元长寿。遣弟阁陂和尚及子铎传、酋望赵佺邓、杨传磨侔等，并子弟六十人献凯吐蕃。陂有神术，人马往来吐蕃，不过朝夕之顷。天宝十一载正月一日，遣宰相倚祥叶乐持金冠、锦袍、金宝带、金帐（状）[床]、安扛伞鞍、银兽器皿、珂贝、珠毯、衣服、駝马、牛鞮等物至邓川，以凤为兄弟之国，册为赞普钟南国大诏，给金印，称东帝。并授凤伽异大瑟瑟告身，都知兵马大将。凤遂改是年为赞普钟元年。发人口百户于浪穹，筑白崖睑城，又遣兵攻掠安宁。天宝甲午十三载六月，唐命前云南郡都督兼侍御史剑南留后李宓、广府节度使何履光等，率十道兵再征云南。兵逼邓川，凤遣凤伽异、段俭魏迎战于江口。时神川都知兵马使论绮里徐救兵已至巴躡山，遂诱宓深入，内外夹击。宓粮尽，士卒饥疲，引还。凤以精兵追战，唐全军覆没，李宓被执，沉江死，何履光遁去。凤因进取嵩州会同郡，据清溪关，以破越析。此二役也，皆凤弟阁陂和尚及凤妃白氏行妖术，展帕拍手而笑，韩陀僧用钵法，以故唐兵再败。时唐先后丧师已二十余万，凤乃敛战骸，筑京观于龙尾关河尾，名万人冢，立碑大书「唐天宝战亡士卒之墓」。而唐宰相杨国忠更揜败以捷闻，叙战功。令清平官郑回撰『德化碑』，唐流寓御史杜光庭书。立石太和国门外，明其不得已叛唐归吐蕃之故。天宝乙未十四载冬十一月，东平郡王安祿山反于范阳，凤乘机以兵取蜀邛州，筑邛子城，及丽水金宝城。升段俭魏为清平官，赐名忠国，旋拜相国。代宗甲辰广德二年，羊苴咩城成，凤名之曰大理城，又名紫城。代宗乙巳永泰元年，凤伽异筑云南城【即今云南府省城。】又筑拓东城，【今云南府昆阳州北平定乡。】遂以兵攻陷曲靖

。代宗丁巳大历十二年，永昌牛生三角，羊生四角，鸡九足，井有光。建观音寺于白崖。先是，逻盛炎时，相国张建成欲于白崖建寺，卜之吉。又地下有三截观音，上截在西，中截在东，下截在东南。因盛炎旋卒，不果建。至是建寺，掘之果然。代宗戊午大历十三年，阁罗凤卒，在位三十年。因子凤伽异先死，【后追谥悼惠王。】孙异牟寻立。

异牟寻【改国号曰大理国。】封云南王，又封南诏王 伪赠廩孝桓王

异牟寻，唐代宗戊午大历十三年即位，年二十四岁。明年改元见龙，又改上元，率兵三万取蜀为东府，又连土番入寇。唐命神策都将李晟击破之。师还，自称南诏王。德宗甲子兴元元年，牟寻迁居史城，【即大厘城。】改号大理国，自称日东王。封岳读，以叶榆【今大理府。】点苍山为中岳，乌蛮【今东川府。】乌龙山【一名绛云弄山，在今禄劝县东北三百里。】为东岳，银生府【今景东厅。】蒙乐山【一名无量山，在厅北九十里。】为南岳，又封南安州【今楚雄府属。】神石亦为南岳，越巂【今永昌府腾越州。】高黎贡山【一名昆仑隅，在腾越、潞江之间。】为西岳，嵩州【今丽江府是。】雪山【一名玉龙山，在府西北二十里。】为北岳。封金沙江【源出吐蕃旄牛徼外犁牛石下，本名犁牛河，又名犁水，讹为丽水。经丽江府、鹤庆州、姚州而东北达于四川马湖府之马湖，即『山海经』所谓若水。『水经注』云：若水经云南之遂久县，即今金沙江巡检司地。昔黄帝长子昌意德劣，不足绍承天位，降居斯水为诸侯，娶蜀山氏女，生颡项于若水之阳，疑即其地也。】祀在武定州，兰沧江【源出吐蕃鹿石山下，本名鹿沧，又名兰沧。兰沧讹为浪沧。自丽江府度云龙州至永昌府，东经顺宁府，达于车里，过交趾地而入于南海。】祀在丽江府，黑惠江【在顺宁府之东入狼沧江，而达于南海。】祀在顺宁府，怒江【源出西域雍望，奔流而下，深不可测。夏月多瘴，经怒夷地入丽江府境野人界。至永昌府境，乃名潞江。】祀在水昌府，为四渎，各建神祠。又立三皇庙。德宗丙寅贞元二年，设官立九爽三托。考疆域，其地东至于铜柱、铁桥、蟠桃、玉榆，东南至于交趾国，南至于骠国，西南至于木落山，西至于太石，西北至于吐蕃，北至于神川，东北至于黔巫。八分之地，属以八演，皆中国降人为之经画者。贞元丁卯三年，寻居大理城。命子弟师事郑回。时寻苦吐蕃征求无厌，会李泌劝德宗招云南以断吐蕃右臂。帝从之，命韦皋为西川节度使，皋受命招抚羣蛮。郑回因说寻归唐，寻以为然。皋遣谍者致书于寻，吐蕃知而疑之，乃责南诏大臣为质。寻愈怨。于是，决计归唐。皋以闻，德宗乃命皋作书谕寻。是年四月，吐番破蜀，来征兵，【蔚按：即吐蕃刳浑瑊清水盟之岁。】寻谢绝之。贞元五年，寻遣乌蛮勿邓大鬼主苴梦冲、两林都大鬼主直那时聘于皋，因入朝。皋遣其属崔佐时报之。时吐蕃使数十人先在，佐时至，寻令更衣入



。佐时不可，曰：「天朝大使。岂衣夷衣？」寻不得已，夜迎之。佐时至，大宣诏旨，令寻斩番使，去其所立之号。寻遂与佐时盟于点苍山下。贞元九年，寻遣使上表，请从韦皋袭吐蕃。诏册封为云南王，以韦皋为云南安抚使。王遣使诣皋，献夷中歌。贞元十年，吐蕃征兵于王，王阳示寡弱，以兵三千应之，自将数万人踵其后。正月，袭吐蕃，战于神（州）〔川〕，断铁桥，在巨津废州，今丽江府西北地。取十六城，俘其五王，降众十余万，获军资甲仗无算。遂遣弟凑罗栋、清平官尹仇宽献捷于唐，并献地图、纳贡及吐蕃所给金印，请复号南诏。于是，唐以祠部郎中袁滋为中丞，赐金紫充册使。赐王银窠金印，印文曰：「贞元册南诏印」。王北面跪受。宴使者，出元宗天宝五载所赐王父凤伽异银跳脱马头盘数物，并指老笛工、歌女曰：「皇帝所赐龟兹乐，惟二人在耳！」使者曰：「南诏世荷唐恩，当深思祖考子孙勿替，尽忠皇唐。」王对曰：「敢不敬使者之命。」随遣清平官尹辅首入谢，献铎鞘、郁刀、生金、瑟瑟、牛黄、麤、纺丝、越燄绕伦马。【蔚按：铎鞘，疑当作择稍，状如残月，有孔旁达，出丽水，饰以金，月祭之血，所击无不洞。段柯古『酉阳杂俎』云：南蛮有毒槩无（刀）〔刃〕，状如朽铁，中人无血立死。言自天而下，入地丈余，祭地乃掘得之，云云。疑即铎稍，毒为铎字之讹，槩字本同稍字也。郁刀铸时以毒药并冶，取莹耀如星者，凡十年乃成，淬以马血，镂金犀饰鐔首，伤人即死。因浪人所铸，又名浪剑，夷中甚宝之。】七月，又攻吐蕃，并破施蛮、顺蛮，【施蛮、顺蛮即施浪、浪穹二诏之后，自南诏并吞五诏，五诏之后不复称诏，止称蛮。】俘其王置白崖城。贞元十二年，取越燄，置软化城。贞元十四年，请以大臣子弟质于朝，韦皋却之。固请，乃尽舍成都，遣就学。贞元十五年，王开白国北方燄地，【今永北厅。】徙弥河白蛮及罗落摩〔上此下夕〕蛮实之，号剑羌。是年，王从韦皋再败吐蕃于铁桥。初，王谋击吐蕃，以遼川、【即今邓川州。】宁北【即今浪穹县。】等城当寇冲，乃峭山深堑，修战备。至是吐蕃谋袭南诏，王告于皋，遣将屯黎州、嵩州以应之。吐蕃引兵攻嵩州，皋严兵以守，别遣将袭击，降其帅，吐蕃惧，退至铁桥。王令人毒其水，吐蕃人马多死，退屯三泸水，王与皋部将杜毗罗击败之。贞元十六年，王率子寻阁劝入朝于唐，召对延英殿，进奉圣乐舞，德宗御麟德殿观之。贞元十七年，王夜绝泸水，斩吐蕃屯卒，又合鬼主破之于泸西。吐蕃大惧，欲悉师收嵩州，以绝南诏。王谓韦皋曰：「吐蕃声取嵩州，实窥云南，请进军羊苴咩城。」皋督诸将分道与王会，陈兵深入，拔木波城。前后凡克城七，焚堡百五十所，斩获无算，生擒论莽热，献于唐，并进铠甲十五万。皋班师，帝遣中使慰抚王。王自是比年贡方物，唐帝深礼之焉。贞元十九年，王封云南金马碧鸡二山之神为景帝，建妙音寺塔，筑大理雪峰长城。宪宗戊子元和三

年七月，王卒。唐遣使祭吊，在位三十年，子寻阁劝立。

寻阁【一作觉】劝【又名新觉劝。】 袭封南诏王 伪谥孝惠王

寻阁劝，唐宪宗戊子元和三年即位，年三十一岁。唐册劝袭封南诏王，赐元和金印。宪宗己丑元和四年正月，改元应道，羣臣上尊号曰骠信，以鄯阐为东京，大理为西京，重修曲靖崇真寺。【寺为晋代所建。】十一月王卒，在位一年。子劝龙晟立。

劝龙晨 袭封南诏王 伪谥幽王

劝龙晨，唐宪宗己丑元和四年即位，年十二岁。唐册袭封南诏王。明年，改元龙兴。铸佛三尊，送佛顶峰寺，用金三千两。元和九年，晨寇嘉定州，有飞天神兵破之。先是，节度使杜元颖守成都时，时滇兵至嘉定之沐源州，忽自惊溃。蜀军获一夷卒问之，云适见遍山神兵，一神将长斧坐三鬼上，声若迅雷，故尔惊走。至是神复现形，自后追杀，即时死酋长二人。盖嘉定向有飞天神庙，两破滇兵者，皆此神也。宪宗丙申元和十一年，晟淫虐失道，弄栋节度使王嵯巔弑之，时年仅十九岁，唐命少监李铕祭吊，在位七年，弟劝利立。

劝利【一作劝利晟】 袭封南诏王 伪谥靖王

劝利，唐宪宗丙申元和十一年即位，年十五岁。唐册袭封南诏王。王嵯巔东寇。明年，改元全义。元和十三年，厚赏王嵯巔，赐姓蒙，封太容。元和十四年，废王嵯巔，赦其罪，命敬信三宝，为清平官。元和十五年，又改元大丰。重修崇圣寺。五月，大雨霖，龙首、龙尾二关倾。除洱河水怪，建龙屋塔。高十二丈。按：『白古记』：唐时洱河有妖蛇，名薄劫，兴大水淹城。蒙国王出示：有能灭之者，赏半官库，子孙世免差徭。部民有段赤城者愿灭蛇，缚刃人水，蛇吞之，人与蛇皆死，水患息。王令人剖蛇腹，取赤城骨葬之，建塔其上，毁蛇骨灰塔，名为灵塔。【在今大理府城南龙尾关内点苍山马耳峯下羊皮村。】每年有蛇党起风来剥塔灰。时有谣曰：赤城卖硬土。今『龙王庙碑』云：洱河龙王段赤城云。永昌生两头牛。穆宗甲辰长庆四年，赐南诏王金印。是年王卒于东京，在位八年，弟丰佑立。【丰佑慕中国之风，独不肯连父名。】

丰佑【石刻作劝丰佑】 册封滇王 伪谥昭成王

丰佑，唐穆宗甲辰长庆四年即位，年七岁。唐遣京兆少尹韦审规持节册封为滇王。王遣洪成酋等人谢。明年，改元保合，又改元天启。西僧赞陀崛哆建鹤庆元化寺。先是，鹤庆地水淹，僧杖刺东隅泄之。水中得樟木，刻为佛，呪之忽灵，远近名曰活佛。【按：活佛，后至明成化间，福建莆田林俊为云南宪副闻之，亲至寺中，将佛火之，得金数百两入官，又毁他寺三百，人呼为林劈佛。】建常平仓，筑邓川城。敬宗乙巳宝历元年，重修大理崇圣寺一名三塔寺

。成。先是，王嵯巔广寺基方七里。圣僧李成眉贤者建立三塔，高三十丈。佛一万一千四百，屋八百九十，铜四万五百九十觔。元和十五年经始，至是工竣。塔顶旧有铁柱款识云：「贞观六年尉迟敬德监造」，盖寺之建久矣。重修云南东寺塔，高百五十尺，西寺塔高八十尺，二寺亦贞观间将作大匠尉迟敬德所建。文宗丁未太和元年，王母出家，法名惠海。太和二年，用银五千，铸佛一堂，废道教。太和己酉三年，僧梦岛造永昌卧佛，长丈六。六月朔，星落如雨。命王嵯巔等寇蜀。先是，西川节度使杜元颖失士卒心，军逃入南诏，因此知蜀虚实。佑遂遣嵯巔等攻蜀，陷嵩、戎、邛三州，攻成都，止西郭十日，掠经书、宝货、子女无算，蜀中残敝。并寇梓州、蜀州。佑上表于唐，请诛元颖。唐改云南为鄯阐府。即今云南府省城。太和四年，唐贬杜元颖循州司马，以义成节度使李德裕为西川节度使。裕至西川，建筹边楼，日召习边事者访问，凡山川险要，南道与蛮相入者图之左，西道与吐蕃相接者图之右，不啻身尝经历焉。乃奏请留北兵以重镇守，修甲冑、备器械。率户二百取一人习战，作雄边子弟等十一军。筑仗义、御侮、柔远诸城以扼要害，复邛崃关，徙嵩州治台登，以夺蛮险。令转邛、雅粟以十月而运，先夏而至，人不苦瘴，边境始安。至是使人于佑，责归所俘。太和五年五月，佑归所俘西川四千人于德裕。太和六年，佑掠骠国民三千，徙之拓东城。武宗乙丑会昌元年，佑遣军将晟君筑横渠道自磨用江至于鹤拓，灌东皋及城阳田，与龙怯江合流入于河，谓之锦浪江。又潞点苍山玉局峯顶之南为池，谓之高河，又称为冯河。更导山泉共泄流为川，灌田数万顷，民得耕种之利。会昌六年九月，佑攻陷安南，经略使裴元裕死之。宣宗丁卯大（宗）〔中〕元年，佑妃卒，佑郁郁不乐，臣下请选妃女备后宫。得罗部【今云南府罗次县。】一美女进之，有宠。女好佛，建罗次寺，至今灵异。六月大旱，佑令僧寿海祈雨。僧曰：「昔汤旱七年，六事自责，天雨七日。今王酒色妄杀，天怒不雨。王如改悔，天雨自至，何以祈为？」佑如僧言，自责自改，数日果雨。佑女至崇圣寺进香，回至城西，为一乘白马人摄去，寻之不得。佑告于西僧赞陀崛哆，哆曰此山神也。乃设灯照之，果在苍山下。哆怒欲行法，移山于河。山神惧，献宝珠供佛，佑乃已。大中十二年，佑遣段酋迁陷安南都护府。遣段宗榜救緬。榜，汤【今云南府宜良县地。】人，佑之勇将。先是，狮子国侵緬；屡求救，至是许之。【按：緬甸即汉之掸国，唐之骠国，其历代莫考。当宋元之时，屡败王师。明太祖洪武十年，緬头目招拔南进贡。十九年，使行人司钱古训赉诏立宣尉司。二十年，緬犯景东。二十一年，犯他郎甸，沐英命都指挥宁正平之。三月，犯定边，沐英同都督冯诚平之。景泰三年，王骥赏緬孟养地。緬喜，乃擒献麓川贼。嘉靖初，緬火烧赉金牌官，（中）〔终〕年猖獗海上，遂至难制。○考自永昌府腾越州入緬，止三十

四程。腾越一日南甸、一日罗必斯、一日郎{白票}、一日甸头、一日甸尾、一日蒙腰、一日甸蓝、一日蒙怜路、一日空地、一日蒙来路、一日大市、一日龙江、一日锅地、一日人列渡、一日江头城、一日景怜{上此下夕}、一日{上此下夕}及、一日马来城、一日赖当、一日山头、一日甸头、一日阿只、一日吴细辰、一日折弓、一日阿越。由阿越下水，九日即至緬城。其地有五大城，江头、太公二城之外，又有马来、安正国、蒲甘緬王三城。酋住金楼，民住竹楼。其下称酋为卜刺浪，称酋妻为米泼刺。酋出人乘轿，水有舟筏。官名有招孟、招录、招刚三等。官无大小，俱金银花宝带。无弓箭。其水有金沙江，险恶，緬恃以为固。涸时，亦仅五里。俗敬佛，重罪对佛发誓，凭僧处断。○入緬又有三道：一由潞江西上；一由腾越七日至麓川；一由景东从木通甸至湾甸渡入芒市，十日至麓川。○此外从潞江上流蒙来渡至景乐沿河有小渡十余处，皆可通。又有三道：一由天步马，一由湾甸，一由阿郊地界，皆可入緬。】宣宗己卯大中十三年，陷播州。李德裕既贬死，西川节度使所任皆非人，僬佯边功，发兵十万袭滇，自建昌入，佑命子世隆为坦绰，同王嵯巂迎战于古宗，今丽江府铁桥以北地。杀唐兵数万人，立铜柱于界上。世隆之母，佑妃也，出家号师摩矣。尝随佑至罗浮山白城，建一寺，南壁画一龙，是夜龙动，几损寺，妃乃复画一柱锁之，始定。按：妃本渔家女，喜浴。为妃后，仍常泛舟西洱河，屏人潜浴于水，感金龙与交，生世隆。隆七岁，拳握始开，有文在其掌曰：通番打汉。古宗之战，唐帝惧世隆为患，妻以宗室女，伺察其所为。女以世隆年庚潜送于帝。帝使太史推之，知其感龙精而生。是年，丰佑卒于东京，在位三十五年。子世隆立，以王嵯巂摄政。段宗牒救緬，回至腾越，闻佑卒，世隆立，嵯巂摄政，移书王嵯巂曰：「天启不幸，驾崩嗣幼，闻公摄政，国家之福。牒救緬以败狮子国。緬酬金佛，当得敬迎。奈中国无人，惟公望重。牒抵国门之日，烦亲迎佛，与国增光。」云云。嵯巂不知是谋，至日迎之。牒令巂拜佛，突斩之于佛前。讨其弑劝隆晟之罪也。牒谕佛得金数千两。时有緬人奉香火者在牒，默祝曰：「愿世代奉敬，今不如愿，惟愿世尊轮生，灭彼国祚。」后果生郑买嗣篡国，灭蒙氏。

世隆【『唐书』作酋龙。】 伪谥景庄皇帝【僭称帝始此，以后郑、赵、杨、段、高五姓之国咸效之。】

世隆，唐宣宗己卯大中十三年即位，年十六岁。明年，为懿宗庚辰咸通元年，改元建极。改西京曰中都，东京曰上都。先是，德宗贞元间，西川节度使韦皋开道通南诏，令岁入贡。异牟寻、寻阁劝二世事唐唯谨，迨劝龙晟及丰[佑]，又数数扰边，大为唐患。又以世隆之名犯太宗、元宗庙讳。唐不册封，隆益致怨望。至是自称皇帝，遣兵取乌蛮、爨、爨之地，置东川郡。前节度

使杜惊变韦皋制度，侵扰蛮中。隆绝朝贡，寇播州。至是李福为节度使，隆遣清平官董成至成都，移书于福。成与福抗礼，福囚之。上闻，有诏释成，召至京师，见便殿，遣还。咸通二年，遣兵陷安南。左仆射同平章事杜惊言：「西川兵弱，南诏强盛，未可轻绝。宜遣使祭吊，谕令改名，行册礼。帝肯之。会隆复寇嵩州，遂止。咸通三年，隆亲寇蜀，取万寿寺石佛归。时高真寺僧崇模有神术，从征。军中乏粮，又值岁暮，士卒思归，僧呪沙成米，呪水成酒，士卒各醉饱。一日僧化蝶回国乱宫，世隆妻以书达隆。隆答曰：妖若再来，令宫人于其衣背绣蝶。后僧复至，宫人绣之。隆见僧衣有蝶，令斩之。刑七次，首不殊。僧白云：用茅锯之乃断。果然。人见僧魂化一黑鹏飞去，盖僧本高真寺鹏巢中所得之儿也。咸通四年，寇西川。咸通五年，陷安南、邕管。咸通六年，陷嵩州。咸通七年，复攻安南。岭南西道节度使高骈救之，隆兵大败，骈遂定安南。咸通十年，隆遣使杨酋庆等入朝，谢释董成之囚。归成都俘三千人。定边节度使李师望杀其使，隆怒，率众攻蜀，陷嘉州。咸通十一年正月，陷黎州，入邛徕关，围雅州，击邛州，遂进攻成都。次眉州，西川节度使卢耽畏众寡不敌，通使请降。继而唐遣东川节度使颜庆复、大将宋威等率兵来战。世隆败屯星宿山，宋威戍沱江。隆迎战于毗桥，不胜，趋沱江，中伏。城中又出突将，夜火隆营，夺升仙梁。隆大败，奔双流江，无梁以渡，乃伪请和，三日梁成而济。咸通辛卯十二年，立鄯阐王宫。咸通壬辰十三年，于白崖诸葛武侯所立铁柱之地，铸天尊柱，高八尺。【蔚昔年曾至铁柱宫，其地界白崖、弥渡、蒙化三境之间。其柱刻字云：建极十三年岁次壬辰四月朔庚子十四日癸丑建立。】咸通十四年，攻黔中。又寇西川，作浮梁济大渡河，防河兵马使黄景复伏兵，半渡击败之。会隆国中新兵继至，接战，景复败走。隆进兵陷黎州，入邛徕关。遂遣王保诚等四十人谩书诣剑南节度使牛丛，欲假道入朝，请憩蜀王故殿。丛囚其使三十八人，释鄯咙及段酋迁二人还。隆乃退兵至新津而旋。僖宗乙未干符二年，攻雅州。西川节度使高骈追至大渡河，大败之，俘酋长五十人，收复黎州、邛徕关，斩黄景复以徇。干符三年，遣使诣高骈请和，不许，斩使者一人。隆怒，自是唐使至不拜，惟拜和尚。骈知之，乃遣僧景仙往谕公主事，隆乃下拜定盟。禧宗丁酉干符四年二月，复寇蜀，高骈御退之。骈又结吐蕃尚延心温、末鲁褥月等为间，筑戎（川）[州]、马湖（沐）[沐]源川、大渡河三城，列屯拒险，料壮卒为平夷军。世隆气夺，因患发疽，卒于越嵩景净寺，在位十八年，子隆舜立。

隆舜【一名法】 改国号曰大封民国 伪谥宣武帝

隆舜，唐僖宗丁酉干符四年即位，年十七岁。明年，改元贞明，又改元嵯耶、承知、大同，改国号曰大封民国。遣使于唐请和，诏许之。自劝龙晟至世

隆以来，侵蜀伐安南，用兵五十余年，帑藏不给，横敛于民，上下俱困。舜立，耽于酒色，委政臣下，故愿求和于唐，乃遣段〔山羌〕宝诣岭南节度使辛谠，请修好。谠奏，许之，以息边患。干符六年，遣使于唐求和亲，无表，只用牒，称弟不称臣。唐帝召百官议，礼部侍郎崔澹曰：「南诏无礼，恐貽后笑。」使者上书与澹争。帝谕解之。议者谓中国多故，南诏寢强，不若权与和亲。便从之。僖宗庚子广明元年春正月，唐命宗正少卿李龟年来和亲。僖宗辛丑中和元年，上表款附。中和癸卯三年，唐以宗室女为安化长公主，妻隆舜，僖宗乙巳光启元年，遣宰相赵隆眉、清平官杨奇鲲、段义宗三人，朝唐帝行在，且迎公主。高骈在淮阳飞章上言：「三人南诏心腹。宜止而酖之。」唐帝从其言。隆眉等死，南诏遂不复振矣。是年昆仑国进美女，舜嬖之。光启二年地震，龙首、龙尾二关、三阳城皆崩。昭宗己巳干宁四年，隆舜多内嬖，常信谗以诛其下，淫虐日甚。竖臣杨登弑之于东京，在位二十年，子舜化贞立。

舜化贞 伪谥孝哀帝

舜化贞，唐昭宗丁巳干宁四年即位，年二十一岁。明年，改元中兴。上书于唐，朝廷欲报之。利州刺史王建上言：「臣在西南，彼必不敢犯塞，小夷何足辱诏书。」遂止。昭宗光化二年，立五学教主。十一月，诛杨登，族其家。光化庚申三年，铸崇圣寺丈六观音，清平官郑买嗣合十六国铜所铸，蜀人李嘉亭成像。【一说唐天宝间，崇圣寺有僧募造丈六观音像，未就。夜忽雨，旦视之，铜也，即取以铸像。像成，白光弥覆凡三日夜，至今人称为雨铜观音。】唐昭宗壬戌天复二年，舜化贞卒，【一说实郑买嗣弑之。】在位五年。化贞有一子，生甫八月，郑买嗣主国事，遂启贞妻曰：「母后深宫，群臣无主，臣当抱太子临朝。」贞妻是其言，以子付之。买嗣抱子出，潜手伤其阴，子哭不已，乃送回宫中。明日，子死。贞妻疑而诘之，买嗣怀不安，遽起兵杀蒙氏亲族八百人于五华楼下，遂篡立焉。

按：蒙氏南诏大蒙国，自细奴逻禅立，起唐太宗己酉贞观二十三年，迄昭宗壬戌天复二年，传十三世，共二百五十五年。

大长和国 传三世

郑买嗣【又名〔上曰下永〕。】 伪谥圣明文武威德桓皇帝

郑买嗣，又名〔上曰下永〕，唐嵩州西泸令陷南诏臣蒙氏，为清平官郑回之七世孙。隆舜时历官侍中，权势日重。隆舜巡幸无度，留买嗣守国，遂专政柄。舜化贞时为相，化贞卒，嗣贼杀其子，篡蒙国，于唐昭宗壬戌天复二年十二月即位，年四十二岁，国号大长和，仍都大理。明年，建元安国。后梁太祖开平丁卯元年，建普明寺。开平三年，铸佛一万尊，送寺祈福，为杀蒙氏八百人故也。开平四年八月，买嗣卒，在位八年，子仁旻立。

仁旻 伪谥肃文太上皇帝

仁旻，后梁太祖庚午开平四年即位，年二十二岁。明年，改元始元，又改元天瑞、景星、安和、贞佑、初历。末帝甲戌干化三年，旻攻蜀。蜀高祖王建发兵拒之，旻兵大败，溺水使者万余人。后唐庄宗癸未（开）〔同〕光元年，施宫寺灾，僧智照撰『封民三宝记』。同光二年旻以朱鬃白马求婚于南汉刘龔，龔以增城公主妻之。明宗丙戌天成元年八月，仁旻饵金丹，躁怒，常杀人，遂暴卒，在位十六年，子隆亶立。

隆亶 伪谥恭惠帝

隆亶，后唐明宗丙戌天成元年即位，年十二岁，明年，改元天应。明宗戊子天成三年，东川节度使杨干贞入朝，弑隆亶而立赵善政，计亶在位二年。

按：郑氏大长和国，自买嗣篡位，起唐昭宗癸亥天复三年，讫后唐明宗戊子天成三年，传三世，共二十六年。

大天兴国一作兴源国。 一世

赵善政 伪谥悼康帝

赵善政，后唐明宗戊子天圣三年，为东川节度使杨干贞所立。改国号曰大天兴国，建元尊圣。善政宁北佉逸塆人。微时樵于山中，倦卧。梦神告曰：「柴有矣！」觉而果得柴数十束，后告其母，母不信，间一日母潜往山中，果然。及仕郑氏，为清平官，出行途中，天坠一石于前，石裂，有「善政为天子」五赤字。于是杨干贞奇之，乃弑隆亶而拥立焉。明宗己丑天成四年，善政待干贞，恩礼寢衰，凡干贞所有请乞，辄不许。干贞恃功怨望，遂赂结诸臣，废善政而自立。善政在位仅十月。

大义宁国 一世

杨干贞 伪谥肃恭帝

杨干贞于后唐明宗己丑天成四年夺大天兴国赵善政之位，改国号曰大义宁国，建元兴圣，又改元大命。干贞茆村人。今大理府宾川州所属地。母名弥录，有美色，蒙隆舜私焉。有孕，适渔人杨氏，生干贞，后又生诏。其父捕鱼，贞立船头，见水中有人龙衣冠冕，左右有凤鸟，白光拥护，乃呼父视之。父见是贞之影，大奇之。长仕郑氏，官至东川节度使。至是夺善政位而自立。贞在位，贪暴特甚，中外咸怨。后晋高祖丁酉天复二年，通海节度使段思平起兵讨之。贞遣弟杨诏等五人出拒。诏兵败，干贞出奔。思平遂得位，寻赦其罪，废为僧。计贞在位八年。

大理国 传十四世

太祖圣神文武皇帝

段思平，其先武威郡北人，世为南诏蒙氏将。唐元宗辛卯天宝十载，及甲

午天宝十三载，唐再伐云南，云南王蒙阁逻凤命世子凤伽异、大军将段俭魏迎战于点苍山及西洱河，两败唐兵。以功升俭魏为清平官，赐名忠国，寻拜相，六传而至思平。其母因过江，水泛触浮木，若有感而娠，生思平，并其弟思良。思平为幕览，【小府副将也。】常游山中，得为帝之讖，又每多异征。时东川节度使杨干贞之弟杨诏者已贵，闻而忌之，使人贼思平。思平逃匿于崇恩寺，【在大理府城南九里。】捕者追至，见蛛网盈寺门，不入，故得脱。后积战功，使为通海节度使。后唐明宗己丑天成四年，杨干贞夺赵善政之位。受诏之讖，常欲除思平。平卜于秀山神祠，就其舅爨判自匿。后晋高祖丙申天福元年，干贞索捕思平甚急。会善政臣守高方，素与思平善，密遣人招思平。思平与其弟思良、军师董迦罗走就之。皆裂冠，变姓名，为猎者，牵一犬至品甸波大村【今大理府云南县地。】宿旅舍。舍有戟，生牛革裹之，是夜风起，戟忽洞革出。思平惊曰：「是何铍利？得非神戟乎！」问主人曰：「戟何为？」曰：「以防夜耳。」曰：「防夜莫若犬。」遂以犬易戟去。行至叶镜湖，湖在大理府云南县地得神马。饥取野桃而食，核上有虫啮「青昔」二字，思平解为十二月二十一日，意其吉兆。于是急趋而前，借兵于东方黑爨三十七蛮部，会于石城，今曲靖府是。以董迦罗为军师。兵集之期，适十二月二十一日也。所向皆克，遂进攻大理，讨干贞。时诏等陈兵据桥，军不能过。思平夜忽得三梦：人无首；玉瓶无耳；镜破。觉而告其下。迦罗解之曰：君乃丈夫，去首为天；玉瓶去耳为王；镜破则无对者，此神示吉兆。是日，有被纓浣沙妇，指渡处曰：「人从我江尾，马从三沙矣，尔国名大理。」从之，乃得过江，击诏等杀之。干贞闻诏等军败，出奔。思平即位，时天福丁酉二年也，年四十四岁。建号大理国，建元文德，仍都大理。天福三年封董迦罗为相国，封高方为岳侯，分治成纪、巨桥等地。封爨判为巴甸侯。祠秀山神，免东方三十七蛮部徭役，赦国中凡有罪无子孙者。天福四年，赦杨干贞罪，废为僧。【一说干贞败后，挈其妻子奔永昌郡。思平遣兵追之，至万剑树，干贞自缢而死。思平俘其妻子亲属。】帝好佛，岁岁建寺，铸佛万尊。后晋出帝甲辰开运元年帝崩，在位八年，子思英立。

### 文经皇帝

思英，后晋出帝甲辰开运元年即位，明年，为出帝开运二年，改元文经。帝母杨氏桂仙娘没而为神，屡着灵应，封为榆城宣惠圣国母。是年，帝叔思良争位，废帝为僧，法名宏修大师。在位一年，叔思良立。【一说思英素不肖，思平在日，常欲废之，不果。迨即位，愈淫戏无度，羣臣废之，而立思良。】

圣慈文武皇帝 太祖之弟



思良，后晋出帝乙巳开运二年即位，明年，改元至治。后周太祖壬子广顺二年，帝崩，在位七年，子思聪立。

思聪 伪谥至道广慈皇帝

思聪，后周太祖壬子广顺二年即位，明年改元明德，又改元广德。宋太祖乙巳开宝二年，思聪卒，在位十七年，子素顺立。

素顺

素顺，宋太祖乙巳开宝二年即位。明年，改元明政。先是，宋太祖丁卯干德五年春，王全斌平蜀，还京师，请取云南，负地图进。太祖鉴唐之祸，以玉斧画大渡河为界，曰：「此外非吾有也。」由是段氏得据南诏，相安无事。太宗乙酉雍熙二年，素顺卒，在位十六年，子素英立。

素英 伪谥昭明皇帝

素英，宋太祖乙酉雍熙二年即位。明年，改元广明，又改元明应、明圣、明统、明治。太宗至道二年，述『传灯录』。真宗己酉大中祥符二年，素英卒，在位二十四年，子素廉立。

素廉 伪谥宣肃皇帝

素廉，宋真宗己酉祥符二年即位，明年改元启明。真宗壬戌干兴元年素廉卒，在位十三年。侄素隆立。

素隆 伪谥秉义皇帝

素隆，宋真宗壬戌干兴元年即位，明年改元明通。仁宗丙寅天圣四年素隆禅位为僧，在位四年。侄素（贞）[真]立。

素真 伪谥圣德皇帝

素真，宋仁宗丙寅天圣四年即位，明年改元正治。仁宗辛巳庆历元年素真禅位为僧，在位十五年，孙素兴立。

素兴 伪谥天明皇帝

素兴，宋仁宗辛巳庆历元年即位，明年改元圣明，又改元天明。素兴性好游狎，广营宫室于东京，多植花草，于春登堤上植黄花，名绕道金棱，云津桥上种白花，名紫城银棱。每春月，挟妓载酒，自玉案三泉，溯为九曲流觞。男女列坐，斗草簪花，昼夜行乐。花中有素馨者，以素兴爱之，故名。又有花遇歌则开，有草遇舞则动，兴令歌者傍花，舞者傍草。盖亦花草之妖也。仁宗甲申庆历四年，素兴在位，荒淫日甚，国人废之，而立太祖曾孙智恩之子思廉。计兴在位三年。

思廉 太祖元孙 伪谥兴宗孝德皇帝

思廉，宋仁宗甲申庆历四年即位。明年，改元保安，又改元正安、正德、保德。仁宗甲辰皇佑四年广源州【属交趾谅山府。】蛮侬智高反郎州，伪号大

南国，自称仁惠皇帝，潜元启历。九月，宋以枢密副使狄青为荆湖宣抚使，督诸军讨之。十二月，狄青至广南，合孙沔、余靖之兵，进次宾川。皇佑癸巳五年正月，至邕州。【今广西南宁府。】上元节，狄青破昆仑关【在南宁府城东二百里，距宾川州二十里。】大破侬智高兵。智高烧城遁，由合江入大理，思廉杀之，函首送京师。是以段氏始闻于中国。仁宗嘉佑八年，命岳侯高智升讨杨允贤，克之。加智升太保，封德侯，赐白崖茹甸之地，寻晋封鄯阐侯，子孙世袭。神宗乙卯熙宁八年，思廉禅位为僧，在位三十一年，子廉义立。

廉义 伪谥上德皇帝

廉义，宋神宗乙卯熙宁八年即位。明年，改元上德。遣使入贡于宋。熙宁十年，又改元广安，作八龙王会。神宗庚申元丰三年，杨义贞杀廉义而自立。计义在位五年，自义贞弑其主廉义而自立，篡位仅四月，鄯阐侯高智升命子清平官高升泰起东方爨燹兵，讨而诛之，立廉义之侄寿辉。

寿辉 伪谥上明皇帝

寿辉，宋神宗庚申元丰三年即位。明年，改元上明，以高智升为布燮，高升泰为鄯阐侯。是年，日月交晦，星辰昼见。寿辉因天变，遂禅位于思廉之孙正明。计辉在位一年。

正明 思廉之孙 伪谥保定皇帝

正明，宋神宗辛酉元丰四年即位。明年，改元保定。又改元建安、天佑。宋哲宗甲戌绍圣元年，明在位十三年，为君不振，人心归高氏，群臣请立鄯阐侯高升泰为君，正明遂禅位于僧，而段氏中绝矣。

按：段氏大理国，自思平建立，后晋高祖丁酉天福二年，讫宋哲宗甲戌绍圣元年，传十四世，共一百五十八年。

大中国

高升泰 伪谥富有圣德表正皇帝

高升泰，宋哲宗甲戌绍圣元年，受大理国段正明之禅即位。改国号曰大中国。明年，改元上治。升泰，岳侯高方之裔，大理点苍山莲花峰下芒涌溪人。将生，其父袭岳侯，智升往石云寺【在点苍山白雪峰麓】进香回，遇一老叟云：「尔家将生贵子，可速归。」智升至家，而升泰适生，心颇异之。及长，有材器，仕为清平官，兼九爽之事，誉望日重。思廉出游，猝遇烈风，吹踏其马。廉将坠，智深跃前扶之。廉德智升，赐以宫人及珠玉。杨允贤（判）〔叛〕，廉命智升讨之，以功加太保，封德侯，旋晋鄯阐侯，世袭。及杨义贞篡逆，智升令升泰起东方兵，诛义贞而立廉义之侄寿辉。辉以智升为布燮，升泰袭鄯阐侯。辉在位灾异迭兴，因禅位于思廉之孙正明。明为君不振，人心归高氏。遂请升泰为君，而正明禅以位焉。哲宗丙子绍圣三年，升泰在位二年，寝疾。遗命

曰：「我之立国，以段氏之弱，我死，必以国仍还段氏，慎勿背我。」及卒，其子高泰明遵遗命，还位正明之弟正淳。段氏复兴，号后理国。高氏相之，政令皆出其门，国人称为高国主，段氏拥虚位而已。

后理国 传八世

段正淳 大理国正明之弟 伪谥中宗文安皇帝

段正淳，宋哲宗丙子绍圣三年复得国，即位，号后理国。以高泰明为相国，执政柄，高泰运为柵主。明年，改元天授。又改元开明，天政，文安，赦徭役。筑楚雄城，【在今楚雄府城西北二里。】以封高泰明之侄高明亮。徽宗癸未崇宁二年，遣高泰运奉表入宋，求经籍，得六十九家，药书六十二部。鄯阐李观音得来朝，进金马杖八十节，人民三万三千户。淳赐得八章礼衣，龙头剑，擢为安东将军。【蔚按：蒙氏时有安东将军，（季）[李]珠所筑安东城，在今大理府赵州城东二里。】缅人、波斯、昆仑三国进白象及香物。十月，彗星见西方，大疫。徽宗戊子大观二年，正淳禅位为僧，在位十二年，子和誉立。

和誉【又名正严】 封云南节度使大理国王，伪谥宪宗宣仁皇帝

和誉，宋徽宗戊子大观二年即位。明年，改元日新。又改元文治、永嘉、保天、广运。七月中元节，各方贡金银、罗绮、珍宝、犀象万计，牛马遍点苍。徽宗辛卯政和元年，地大震，损十六寺。三十七部（判）[叛]，高相国泰明讨平之。使四子高明清居鄯阐镇守。政和五年，缅人进金花、犀象。政和六年。遣儒官钟震、黄渐赉勅褒高泰朋相国忠贞，封平国公。是年，遣使入贡于宋。高泰明卒，封国师。泰明生八子，高智昌以罪流死。其下伊、何二人谋为执仇，乘誉入寺进香，图弑逆，事露被收。誉嘉二人之义，赦之，为立义士冢。高泰运立，主国事。六月，三日并出。政和丁酉七年，命子紫琮充进奉使，入贡于宋。诏遣使册封誉为金紫光禄大夫、检校司空、云南节度使、上柱国、大理国王。徽宗己亥宣和元年正月，彗出，慕宁、远、矣、破、马等叛。三月，出师征之，兵败。三十七部蛮复叛。陷鄯阐，高明清死之。郡臣以高升泰侄商量成有德，请立为相，号中国公。徽宗丙午靖康元年五月，金星入月，大火，焚三千九百家。南宋高宗丙辰绍兴六年，王遣使贡象马于宋，广西经畧安抚使奏之，诏护送行在，优礼答之。绍兴十六年三月十四日，大雾，历二十四日方开。高宗丁卯绍兴十七年，王老，因诸子内争外叛、遂禅位为僧，在位三十九年。子正兴立。

正兴【又名易长】 伪谥景宗正康皇帝

正兴，南宋高宗丁卯绍兴十七年即位。明年，改元永贞，又改元大宝、龙兴、盛明、建德。高量成让相位与侄寿贞，退老楚雄城。人化其德，名城曰德

江城。孝宗癸未隆兴元年三月，寿贞卒。寿昌立为中国公。孝宗壬辰干道八年四月，重雾，十六日方开。正兴禅位为僧，在位二十五年，子智兴立。

智兴 伪谥宣宗功极皇帝

智兴，南宋孝宗壬辰干道八年即位，明年，改元利贞。又改元盛德、嘉会、元亨、安定。遣李观音得等至广西横山砦今在广西南宁府江上。求市马。李观音得夺寿昌位，与侄贞明。阿机起兵夺贞明位，还寿昌。贞明遂据鹤庆，号明国公，伪谥义地威天聪明仁帝。高妙音自白崖起兵，据鄯阐。时有妙音之甥成贤、成正二人来谒，意在夺鄯阐。妙音觉之，与之盟于天王庙。二人口含丁香叶，出庙吐之曰：「盟非我也，叶也。」未几，二人起兵，方战，见白马将斩之。白马将，乃庙中二力士也。光宗庚戌绍熙元年，修十六寺。宁宗乙卯庆元元年，修龙首、龙尾二关，三阳城。宁宗庚申庆元六年，智兴卒，在位二十八年，子智廉立。

智廉 伪谥享天皇帝

智廉，南宋宁宗庚申庆元六年即位。明年，改元凤历。又改元元寿。使人入宋求『大藏经』一千四百六十五部，置五华楼。宁宗乙丑开禧元年，智廉卒，在位五年。弟智祥立。

智祥 伪谥神宗皇帝

智祥，南宋宁宗乙丑开禧元年即位。明年，改元天开。又改元天辅、仁寿。征三十七蛮部，至寻甸平，河水绝流。理宗丁酉嘉（禧）〔熙〕元年，封高隆鄯阐王，以高泰祥为相国，以光日为演习。大府主将也。举贤育才，时和年丰，称治国焉。理宗戊戌嘉（禧）〔熙〕二年，智祥禅位为僧，在位三十三年。子祥兴立。

祥兴 伪谥孝义皇帝

祥兴，南宋理宗戊戌嘉（禧）〔熙〕二年即位。明年，改元道隆。理宗甲辰淳佑四年，蒙古兵出灵关，伐大理。祥兴遣将高禾迎战，禾败死之。段连佑归宋，宋遣使吊祭，致经书、银缎，为高禾拒蒙古兵战歿也。理宗辛亥淳佑十一年，为蒙古宪宗蒙哥之元年，祥兴卒，在位十三年。子兴智立。

兴智 赠天定贤王

兴智，南宋理宗辛亥淳佑十一年即位。明年，改元利正。又改元兴正、天定。是年，南宋理宗壬子淳佑十二年，为蒙古宪宗之二年七月丙午，太弟忽必烈等奉宪宗命，伐大理。受制专征，以大将兀良合台总督军务。八月，次临洮，由六盘踰吐番，凡行山谷二千余里无人之境。先遣王律朮、王侯、王鉴来谕大理，道阻而还。九月，次忒刺，分三道进。兀良合台率西道兵，由晏当路，诸王抄合也只烈率东道兵，由白蛮，忽必烈率劲骑，由中道。乙巳，至满陀

城，留其辎重。十月，过大渡河。十一月，至白蛮打郭砦。十二月，再遣三使入大理，招兴智，皆被杀。智命相国高泰祥守金沙江，与蒙古将伯颜不花、虎儿敦等相持。忽必烈命众以革囊潜济江，破吐番，涉摩荻，出石门，所过降之，遂进薄大理。泰祥回军，奉兴智拒战，不胜。蒙古兵入上关。智奔鄯阐，泰祥退至统失逻【先为姚安府，府裁，今为姚州，属楚雄府。】募兵于三十七部未至，而蒙古兵已长（驱）〔驱〕而入，泰祥被执大理，不屈，乃斩于五华楼下。祥临刑叹曰：「段运不回，天使其然，为臣殒首，盖其分也。」时白日正午，忽云起雷震，天鼓大鸣，忽必烈曰：「忠臣也。」泰祥夫人段氏，抱孤儿高琼、高长寿等申诉。忽必烈目儿顾左右曰：「此忠臣后，宜善视之。」许以世其官。【高泰祥为大中国升泰九世孙。】遂灭段氏而有其地，得五城、八府、蛮部三十有七。乘胜入吐蕃，降其酋。明年，南宋理宗癸丑宝佑元年，为蒙古宪宗之三年，忽必烈班师。大将兀良合台拔鄯阐，获兴智以献，宪宗命赦之，封为摩诃罗嗟，管领八方，仍守其地，世袭总管。计兴智在位二年，宪宗授兀良合台银印，加大元帅，还镇大理。以刘时中为宣抚使，与兴智同安辑焉。南宋理宗庚申景定元年，为蒙古世祖忽必烈之中统元年，兴智率其季弟段信直福北行，朝于世祖，道卒。计为总管又七年。蒙古遣使来祭吊，文曰：「段氏承八姓正位，归有新统，既顺天时以向义，犹得国王以栖迟，实国家待远方之仁，由贤王能左右之义。受命以来，朝夕惕励。莱尔维勤，用征不廷，正当共享亨嘉之运，胡意遽罹霜露之灾，呜呼！当朕未集大统，乃为叔季之国。兹既承景运，合正君臣之称，参录不替于子孙，诏禄宜昭于典册，特遣太常省祭，赠为后理国向义天定贤王段公，尚赖神麻，永保祚土。所赠王爵，后不为例。」明年，南宋理宗辛酉景定二年。为蒙古世祖中统二年，世祖勅授王之弟信直曰【则段实。】总管守大理。命之曰：「向率我以临尔境众据国人之请，因从城下之盟，款附而忠勤益着。庸示至优之礼，以彰同视之仁。可革帝号，锡以虎符，总理大理、鄯阐、威楚、统矢、会川、建昌、腾越诸郡，抚恤已附之民，招集未降之国，卿其勉之。」

按：段氏后理国，自段正淳复国，起宋哲宗丙子绍圣三年，讫南宋理宗癸丑（实）〔宝〕应元年，传八世，共一百五十七年。

增订南诏野史下卷

明四川新都杨 慎升庵编辑

大清湖南武陵胡 蔚羨门订正

段氏总管【除天定贤王段兴智受封总管七年外】起段信直曰【即段实】讫段世，共袭十二世。

## 段实【一名信苴日。】

段实，于南宋理宗景定二年，蒙古世祖之中统二年，入朝于世祖，袭总管，赐虎符，领大理、威楚、鄯阐、统矢、会川、建昌、腾越等城，自万户以下皆受节制。南宋理宗癸亥景定四年，为元世祖中统四年，蒙古设大理都元帅府，命昔撒昔总制鬼国、大理两路。理宗甲子景定五年，为世祖至元元年，妖僧舍利威结威楚、统矢、鄯阐及三十七蛮部叛，实讨之，大破于威楚、统矢、安宁等处，又破释多罗十余万众于洱河海口。南宋度宗丁卯咸淳三年，蒙古世祖至元四年，以皇第五子忽哥赤为云南王，镇大理。至元五年，忽哥赤受命与安南国王讨占城、真腊。南宋度宗咸淳六年，世祖至元七年，置大理路军民总管府。南宋度宗辛未咸淳七年，为蒙古世祖至元八年冬十一月，世祖改国号曰元。云南王忽哥赤为元帅寶和丁所杀。元伐金齿、缥甸，降之。分大理三十七蛮部为南北中三路，遣阿鲁忒儿宣抚大理，招谕诸蛮。南宋度宗辛未咸淳十年，元世祖至元十一年，封宗室脱忽鲁为云南王，命云南行省平章政事赛典赤建云南各衙门。妖僧舍利威复叛，实遣石买等诡为商贾，执贄往见，挺矛鏖杀之，梟首于市。元世祖赐实白金及金织纹衣。南宋恭宗丙子德佑二年，元世祖至元十三年，授实为大理等处宣抚使。缅甸叛犯永昌，元命纳速刺丁【赛典赤之长子，后封延安王。】伐之，破砦三百，因天暑，还师。复命诸王相吾答儿、右丞太卜、参政也罕的斤伐缅，招讨使法烈先驱造舟于阿若、阿禾两江，进拔江头、太公二城，金齿、乌蒙皆降。南宋帝昺庚辰祥兴二年春二月，为元世祖忽必烈之至元十七年，宋亡，元入主中国。以忽哥赤之子也先帖木儿为云南王。命忙兀鲁征八百媳妇。缅败忽都帖木儿兵，诏思、播土官田、杨二处兵助讨之。命征缅官番听云南王节制。至元辛巳十八年实率子阿庆入觐，元祖嘉其忠，晋大理、威楚、金齿等处宣慰使都元帅。升辞，复拜为云南诸路行中书省参知政事，留阿庆宿卫东宫。至元壬午十九年，实受勅迎征缅师，于金齿病卒。诏以其弟忠为大理宣慰使兼军民万户府，赠实为武定公。实任职二十二年。

## 段忠 实之弟

段忠，元世祖癸未至元二十年袭。是年，忠随元元帅阔木征芒部、两林蛮及会川等处，破贼立功，元授忠为善阐酋，赐虎符。元置邦牙宣慰司于蒲甘城，命云南王也先帖木儿率招讨使怯烈总兵三千往镇之。忠奉云南王命伐武定。冬十二月忠卒，以实之子阿庆为大理金齿等处宣慰司都元帅、佩金虎符，封宣武将军，晋镇国上将军，尚公主。遣归，复授云南行省参政。忠任职一年。

## 段庆即阿庆。实之子

段庆，元世祖甲申至元二十一年袭。至元二十五年以云南王也先帖木儿移镇大理，进封营王。至元二十七年冬十月，封皇孙甘刺麻为梁王，镇云南。至

元二十九年改封梁王甘刺麻为晋王，镇北边。至元三十年，封甘刺麻之子松山镇云南。至元三十一年世祖崩，孙铁木耳立，是为成宗。成宗丙申元贞二年，置彻里路，即车里军民宣慰使司。令与八百犬牙相制。秋八百叛命，也先不花征之。成宗己亥大德三年，云南水西土官宋隆济叛，贵州知州张怀德战死。云南行省麻九儿讨之，追杀贼首撒月，斩首五百级。庆奉勅征交趾，平之。入朝，带僧左黎同往，适成宗手疽甚，黎以法水洗之，立愈。帝欲试其术，乃掘地窖，令八人潜其中击鼓，佯云有怪，召黎治之，黎行法，顷之不闻鼓声，启窖视之，则八人已死。帝敬其法，封为国师。大德四年，缅人僧哥伦作乱。缅酋执其兄阿散哥也，寻释去，阿散乃率其党杀酋。酋次子奔愬京师，诏遣薛超兀儿率行省兵讨之。大德五年，金齿、八百叛，不输粮，杀官吏，元命右丞刘深、哈刺带、郑佑等征之。刘深协求水西土妇节金三千两、马三千匹，土官宋隆济遂叛，围深等于穷谷中，梁王阔率兵救，解之。冬，云南地大震，御史陈天祥谏伐西南夷，不报。大德七年，罢征八百，免右丞刘深官，收符印。左丞相哈刺哈孙议深微名首衅，丧师辱国，劝帝诛深，遂杀之。深即往以兵偪南宋帝昺于谢女峡者。大德八年，立平云南碑于点苍山。顺元宣抚宋阿重获其叛叔宋隆济，朝命升职，赐衣一袭。滇池有蛟，化少年淫妇女，有神僧赵伽罗者，命黑胡神擒之，至暎水见形，斩之。神即土主也。成宗丙午大德十年，罗雄土官阿那龙少叛，据越州。【今在曲靖府南六十里，本唐之悦州，其川名鲁望。】命右丞汪惟能讨之，追至曲靖，斩那龙少。是年庆卒，弟正袭。庆任职四十三年。

#### 段正 庆之弟

段正，元成宗丁未大德十一年袭。正招蒙化山中生爨入籍。元授正为参政，仍大理军民总管。晋宁建盘龙寺。有神僧觉照者，段氏族入，号莲峯，游东山见龙潭绝幽胜，乃咒龙令徙。龙去，水涸，建寺其地。【蔚按：莲峯僧于顺帝之至正末入定塔中。】武宗海山戊申至大元年，沾益、乌蒙地大震，三日并出。至大二年三月，梁王松山风疾，诏封皇第七子西平王奥鲁赤之孙老的代镇云南。仁宗爱育黎拔力八达壬子皇庆元年，诏罢征八百。皇庆癸丑二年冬十月，学士李孟奏准开科，三年一试。时九成殿生芝，天下共取士三百名，每榜云南取五名，内蒙古二名，塞目二名，汉人一名。以八月二十日初场，二十三日次场，二十六日三场。仁宗乙卯延佑二年十一月，封武宗子和世珠为周王，出镇云南。仁宗丙辰延佑三年，正卒，庆子隆袭。正任职十年。

#### 段隆 庆之子

段隆，元仁宗丁巳延佑四年袭，元授隆为大理军民总管。延佑己未六年，云南行省奏：「夷俗：凡土官无子，即以妻代管。请听之。」诏曰可。延佑

庚申七年，封甘刺麻孙王禅为云南王。英宗硕德八喇癸亥至治三年，进封王禅为梁王，封其子帖木儿不花为云南王。是年八月，诸王按梯不花、（索）[孛]罗、月鲁铁木儿等及御史大夫铁失弑帝于南坡行幄。九月泰定帝也孙铁木儿即位。十二月流诸王月鲁铁木儿于云南。泰定四年，洱海有水怪，牛猪形短项金睛，兴水为患。大理一道人向隆取黄金百镒，隆与之，乃以金为索，沉于河，怪即日徙于浪穹宁河。按：『六诏灵源记』云：宁河无底。明宣德间，有渔人李应捕鱼，网得金索，旋得旋断。一渔者诫之曰：可止矣。应贪甚，尽曳之，索将穷，惊其怪，风浪陡作，应并舟俱溺，至今为患。文宗图帖睦尔庚午至顺元年，以豫王阿忒思纳失里出镇云南。诸王秃坚据云南叛，杀廉访使，自称云南王。元诏枢密帖木儿讨之，发朵甘思等处兵分道进。至四川建昌、罗罗斯，权寻甸府官曲朮集义兵讨秃坚，败贼伯忽于马龙，追至金马山，擒之。是年，隆以老退闲，子俊袭。隆任职十四年。

#### 段俊 隆之子

段俊，元文宗辛未至顺二年袭，元授俊为云南行省平章。乌撒部奏：「云南驿输征甚苦，愿属四川。」奏下参政贾敦熙议之。是年俊卒，族弟义袭。俊任职一年。

#### 段义 俊之族弟

段义，元文宗壬申至顺三年袭，朝命止授为承务郎、蒙化州知州。是年阿容禾叛于中庆路，义助兵讨平之，以功升参政。九月，乌蒙土官禄余寇顺元，云南行省遣都事那海奉诏往谕，授余为参政。冬十一月，云南行省奏：「国马每月上寅日给盐，饮之无病。因伯忽反，盐不给，马多死。」诏四川以盐给之。是年义卒，隆子光袭。义任职一年。

#### 段光 隆之子

段光，元顺帝妥权帖睦尔癸酉元统元年袭，朝命止授为承务郎、蒙化州知州。番兵作乱，孟州判官李生等守白崖，值高蓬新败番兵，乘胜长驱破河尾关。光率兵大败之，斩馘无算，河水尽赤，为之不流，得战马甲仗数千。光赋凯旋诗云：「雨锁金门百里城，神州花木管弦声。齐天苍岳参云峻，界地榆河射月明。梵宇三千朝呗朗，招提八百夜香清。恒沙善果心无异，何患愚夷治不平。」元统二年，光以先与梁王把匝剌瓦尔密孛罗因分域构隙，至是遣张希矫、杨生、张连等发兵攻梁王，不胜，士卒多死，希矫等遁归。顺帝至元元年，梁王侵大理，光自督兵与战于昆弥山即今大理府赵州南之定西岭，梁王大败。凯还，侍翰杨天甫作『长寿仙曲』上光云：「蒙氏锤王气，驾馭万乘唐。南龙光对北金锁，东洱水朝西点苍，四面固金汤。江绿春杨柳，岸清古雪霜。屏障龙吟梅破王，竹林鹤立菊舒黄，四季景如妆。此生诚庆幸，有眼睹明王。」光大



喜，设宴谢之。顺帝辛巳至正元年，玉案山生水小赤犬，羣走如飞。段雄正曰：「此天狗星所化，大兵压境之兆。」经二年方绝。又下铁雨山石，民屋俱穿，人值之多击死。梁王刺杀段氏臣高蓬。先是，光令蓬督兵罗那关，梁王使人暗招之，蓬不从，答之诗云：「寄语下番梁王翁，檄书何苦招高蓬，身为五岳嵩山主，智过六丁缩地公，铁甲铁盔持铁槊，花鞍花索驭花骢，但挥眼前黄石阵，孤云击破几千重。」梁王忌之，乃重贿蓬庖人，刺杀之。顺帝甲申至正四年，光卒，弟功袭。光任职十二年。

### 段功 光之弟

段功，元顺帝乙酉至正五年袭，朝命止授为承务郎、蒙化州知州。至正六年，木邦夷思可叛。元命河南参政贾敦熙督师会云南路兵讨之，以功为前锋，屡战克捷。叙功升功为大理总管，寻升参政。至正癸巳十三年，红巾贼流入建昌，旁掠云南边地。阿次失里讨平之。至正十五年三月，元窜太师脱脱于云南。中书右丞哈麻、御史袁赛因不花等陷之也。十二月，左丞相哈麻矫诏杀脱脱于阿轻乞之地，时年四十二岁，天下冤之，两日相荡。是年，梁王宫中有怪。左右启王曰：「盘龙寺僧莲峯，能驱邪。」王礼请至，行法，怪息。王喜，留宫中供养，至夜密问之曰：「今中原纷乱，后事如何？」僧曰：「二十年后祚尽矣。」至期明师果南下。至正十六年，黑井有毒龙，兴水溢井，损民居。莲峰建寺，书铁符沉井中，害息。又宁州有虎啣人，莲峰洒净水驱虎远去，明日虎果去。七月，元以四川廉访使蒲机云为云南诸路廉访使。至正癸卯二十三年三月，红巾贼明玉珍率其党李芝麻同弟明二等将兵三万攻云南。入金马山，梁王把匝剌瓦尔密奔楚雄。四月，梁王发中庆，至石碑村，红巾入城，梁王闻报，感而自咏云：「野无青草有黄尘，道侧仍多战死人。触目伤心无限事，鸡山还似旧时春。」随命陝西参政车力帖木儿拒之，擒明二。时四方乘机窃发，羣盗满山，功乃谋于外外杨智，字渊海者，同稽于卜，卜告吉。又得子宗、子秀兵至，功遂从梁王进兵，吕合败红巾于关滩江。红巾收合余衟再战，杀段氏之骁将铁万户，又有江心庄人杨胜力战死。梁王为文祭之曰：「生于江心，为我门户，我旧不识，用备其数，能卫社稷，春秋与之，惟忠惟烈，尔则处之，噫！义重于生，生必有死，丈夫之事，识者有几。愿气作山河，魂归苍洱，英杰复生，以保我之昆裔。」祭毕而哭，一军感泣。是夜，红巾屯古田寺，功令人焚寺，红巾乱，以铁骑捣之，死者大半，追至回蹬关，又大破之。副将谢得攻安宁，功力战杀二千人，谢得奔中庆。于夜功谍者拾得一书，乃明玉珍母寄珍书云：「自尔去后，老母平安，征云南务要得之。兵粮不足，随后发来，不可轻回。」功阅书，令杨智易其辞曰：「自尔去后，老母不安，臣下乱法。又闻中国人马入界，非止一处。尔须急回，迟则难保。大夏天统元年，太

后平安书。」遂募亡命者赍书往。有打金箔人陈惠愿行，惟虑老母在。功许养其母，惠遂往。玉珍得书，挥之去令回报，迨夜，玉珍旋军。功追掇至七星关，大破其众。梁王回中庆，奏升功为云南行省平章，以主阿{ㄛ 盍}妻之。一日主与{ㄛ 盍}宴酣，{ㄛ 盍}歌『金指环』云：「将星挺生扶寶阙，寶阙金枝接玉叶。灵辉彻南北东西，皓皓中天光映月。玉文金印大如斗，犹唐贵主结配偶。父王永寿同碧鸡，豪杰长作擎天手。」功久居梁王府，嫡妻高夫人在大理作词寄功云：「风卷残云，九霄冉冉逐。龙池无偶，水云一片绿。寂寞倚帟屏，春雨纷纷促。蜀锦半间，鸳鸯独自宿，珊瑚枕冷，泪滴针穿目，好难禁。将军一去无度，身与影立，影与身独，盼将军只恐乐极生悲冤鬼哭。」至正二十四年春，功还大理，至洱海金鸡庙，夫人遣人适来报生子，功喜，作歌曰：「去时野火通山赤，凯歌回奏梁王恚。自冬抵此又阳春，时物变迁今又昔。归来草色绿无数，桃花正秣柳苞絮。杜鹃啼处日如年，声声只促人归去。」至正二十五年，功思新婚，欲往梁王所。员外杨智于壁间题诗留功，张希矫亦上书留行。功曰：「寶剑岂埋荒土物耶！」矫苦留不已，功怒流矫于顺州。【顺州，前明属鹤庆府，今裁在永北厅城西一百二十里。唐时地名牛睽。】遂与夫人别，倍道至中庆。梁王疑之，私议曰：「平章此来，得无有吞金马咽碧鸡之心。」其下有妒功者复谗构之。王与阿{ㄛ 盍}谋欲以孔雀胆毒功。{ㄛ 盍}私泄之，愿与西归。（今）{令}功周防，功不信。是年滇大旱，人言定远有禅僧连精，通瑜伽秘密教，能降龙役鬼。启梁王，王遣人迎至，僧设坛祈雨，咒毕，钵中出一小蛇，遂大雨。王大喜，酬以金帛，辞，役鬼荷担，行空而去。顺帝丙午至正二十六年春，中原盗蠡起，临安廉访使支渭兴三恳休，梁王不允，遣使金闾慰，赐羔羊。渭兴自咏曰：「年高才薄忝清流，欲挂朝冠不自由。且喜壮怀无诉谍，从教行道有鸣驺。故园花木无由见，何日干戈定得休。九十春光还欲暮，放怀聊与醉金瓯。」重午节，梁王宫门外观射柳，随侍文武赐宴，支渭兴诗贺曰：「平地如席草如茵，少年将军酒半醺。朱鬣马穿人影过，绿杨枝逐箭锋分。旌旗色映宫前瓦，鼓角声飘海上云。何日鲸鲵俱授首，普天偃武共修文。」七月，梁王偕功东寺讲经，至通济桥，功马逸，王乘机令番将掖杀之。阿{ㄛ 盍}闻之恸哭曰：「昨灯下吾犹言，云南施宗施秀二人以胭花殒命，奈何不信。今果然。」命侍女锦被包之，以王礼敛送归大理。诗挽之云：「吾家住在雁门深，一片间云到滇海。心悬明月照青天，青天不语今三岁。黄嵩歷乱苍山秋，误我一生踏里彩。【华言锦被也。】吐噜吐噜段阿奴，施宗施秀同奴歹。云片波潏不见人，押不芦花【华言起死灵草也。】颜色改。肉屏【华言骆驼也。】独坐细思量，西山铁立【华言松林也。】风潇洒。」功丧既行，阿{ㄛ 盍}遂不食死，以殉焉。其家臣员外杨智渊海闻而亦死之。智临

死诗曰：「半战功名百战身，不堪今日总红尘。死生自古皆由命，祸福于今岂怨人。蝴蝶梦残滇海月，杜鹃啼破点苍春。哀怜永诀云南土，絮酒还教洒泪频。」【明洪武间都督冯诚经功墓，亦步原韵题诗，吊之曰：「田横五百剑孤身，转眼关山半委尘。北阙玉楼召客记，南滇粉壁说诗人。苍山夜黑云遮月，金马天寒鸟怨春。共惜平章迷绣幕，至今愁听水声频。」】功死，长子宝自称平章，立于大理。功任蜀二十二年。

### 段宝 功之子

段宝，于元顺帝丙午至正二十六年八月，因父功为梁王所害，遂自称平章，立于大理。是年，梁王开科取士，以支渭兴主试事。梁王复听谗，诛锄段族。梁段既结仇，数数构兵。鹤庆知事杨升调和二家，自金鸡庙分界，南属梁王，北属段氏，力劝息兵，百姓稍宁。至正丁未二十七年四月，梁王生日，羣臣称贺。王宴于昆明池上，省宪官献诗曰：「贤君添算宴嘉宾，幄殿先施巨海滨。万里晴天开锦绣，一川芳草踏麒麟。笙歌暖送金杯酒，铠仗宽围玉佩人。醉饱百官咸稽首，愿王高寿过千春。」中庆路土主庙圯，梁王重修，立牌纪事。

【先是，至正十二年庙为耆民杨光所修。至二十三年红巾贼入滇，陷中庆，毁民居，庙亦被焚。】梁王欲并段氏，遣人刺宝，弗得。又令平章矢刺七攻大理，皆不克。乃遣使通好，奏授宝为云南右丞，以和之。红巾复入滇，梁王命叔铁木的罕赍勅借兵于宝，宝答书曰：「杀虎母还餒虎子，分狙栗自诈狙，公假途灭虢，献璧吞虞，金印玉书，设钓鱼之香饵，绣阁艳女，备擒雉之网罗。况平章已死，只遗一奴一嫠，奴可配阿妃，嫠可配华黎氏。二事许诺，当借大兵。不然，金马山换作点苍山，昆明海改作西洱海，兵来矣。」书后又附一诗云：「烽火狼烟信不符，骊山一举任枝梧。平章枉挂红罗帐，员外空题粉壁图。凤去岐山祥兆隐，麟戕大野瑞光无。自从界限鸿沟后，成败兴亡不属吾。」梁王读而深恨之。是年，明太祖取燕京，元顺帝北遁，元亡。明太祖戊申洪武元年，梁王复通好于宝，辞甚卑逊，宝许之和。时有蛮舍兴者，自元江攻入鄯阐，王惧欲出奔，宝以唇齿之故率兵救之，击走舍兴。王德宝，升为武定公。勅曰：「段宝归附而来，忠勤懋着，父子秉忠，征讨克捷，乃于戎马倥偬之中，干戈纷扰之际，不第远朝且兼平乱。宜示至优之数，以彰匡济之勲，兹特升宝为武定公，仍总管大理军民府。尔其不负初心，永保世爵，以光大尔赤城于无穷。宣光元年勅。」云云。宣光乃故元顺帝太子立于应昌年号也。太祖洪武辛亥四年，宝降于太祖，上奏云：「臣闻有天下者为天下之主，有列土者为列土之君。卑臣宝虽隔万里之遥，每切中原之向。大理有二帝三皇之后，一方九姓之传，汉晋六朝以来，大蒙国受封于前唐，残唐五季而终，二理国继守于两宋，臣祖思平等恪共藩复，贡礼屡修于中土，华风远畅于边隅。迨至故元，不

尚仁义，专事暴残。顺帝已遁北方，梁王犹祸鄯阐。迺闻明主奉天承运，御极南京，中原太平，边徼宁乂。意者中国有圣人，履尧舜之正统，陋汉唐之浅图，天时人事然也。或命臣依汉唐故例，岁贡天朝，或仿元代职名，俾守旧土。庶深谷回阳，幽扃照日，八方浴德，六合同春，垂怜边境，救恤一方。欲修进贡，恐触明威，合待事体之定，专候圣旨之颁，谨此。」专差段贞、王伯鹞驰奏以闻。太祖诏谕答之。洪武五年，宝女兄名羌娜，小名僧奴，又名宝姑者，适建昌土官阿黎。先是，羌娜绣一旗，至是将嫁，以旗付宝嘱曰：「母常语我云尔父为梁王所害，必当报仇，惟望尔辈长大。我闻母言，故绣此旗已五年矣！今我嫁至夫家，收拾建昌、东川军马，飞报若到，女急来应，慎勿违焉。」临行，又以二诗别宝云：「珊瑚钩起出深闺，满目潸然泪湿衣。冰鉴银台前长大，金枝玉叶下芳菲。鸟飞兔走频来往，桂秀梅香不暂移。惆怅同胞未忍别，应知恨重点苍低。」「何彼秾兮花正红，香车独去洱河东。鸿飞雪岫难经目，风刺霜林易割胸。云白天高连水远，月新春迭与秋重。一作闺里绣旗冤父魄，天边提剑属儿曹。泪珠恰似通宵雨，千里关山几处逢。【一作须知恨重苍山小，回首寒云千万重。】」洪武辛酉十四年四月，国中巫女歌曰：「莫道君为山海主，山海笑谐谐。园中花谢千万朵，别有明主来。」数日，宝卒，子明袭。宝任职十四年。

#### 段明 宝之子

段明，明太祖洪武辛酉十四年四月袭，梁王授明为宣慰使。九月，明太祖命颖川侯溥友德，列侯曹正、王弼、金朝兴，都督郭英、张铨等，率师三十万征云南。帝出钱于龙江。友德至湖广，分遣都督胡海洋、陈桓等领兵五万，由四川永宁趋乌撒。友德等率大军由辰沅趋贵州。进攻普定，擒土酋安瓚，诸苗蛮犵狁闻风迎降。十二月，溥友德等兵至普安，攻下之，进至曲靖。先是，梁王把匝剌瓦尔密遣其司徒平章达里麻将精兵十余万屯曲靖，以拒明师。沐英曰：「彼谓我师疲于深入，未有虞心，乃可破也。」友德然之，遂倍道进师。将至白石江，忽大雾四塞，冲雾及江而上。顷之雾雾，则两军相望，达里麻见之大惊，以为神军飞至，拥军阵于南岸。沐英分遣一军，沂流潜渡，出其阵后，吹铜角，树旗帜，为疑兵山谷间。达里麻急撤阵后，军以御之，{山斤}上军阵乱。友德等趣师济江，一涌而渡，既渡，整列进战。敌众披靡，生擒达里麻，横尸十余里，俘其众二万人，友德悉慰遣之。友德进击乌撒，分遣沐英等趣云南。梁王闻达里麻破，弃城走晋宁州，忽忽纳岩，寻入滇池岛中，先缢其妃，自飲药不死，投水死之。父老收葬云南城西三十里净耳山，土人立庙妙音寺侧。【后至嘉靖间，拆庙材修社学，乃因旧址为小寺祀之。】云南右丞观音保以城降。英等入城，秋毫无犯。收梁王金印并符信图籍，安抚其民。友德亦

自曲靖循格孤山而北，以应永宁之兵。时元右丞实卜闻胡海洋等进自永宁，乃聚兵赤水河，以拒之。海洋等造木筏，夜半济河，而友德亦至，实卜遁去。友德令将士于乌撒筑城，版锛方具。蛮众复合，斩首三千余级，余众溃散。遂城乌撒，得七星关，以通毕节。又克可渡河，于是东川、乌蒙、芒部诸蛮震惧，望风降附。先是，洪武壬子五年正月，帝遣翰林待制王祎、行参政吴云持诏谕云南梁王，令奉版图来归。梁王初不从，后有降意。至洪武六年十二月，会元太子爰猷识里达刺立于汉北，使侍郎脱脱征饷于云南，脱脱觐知梁王有二心，因以危言偪王，杀使臣以绝其念，王遂杀祎，父老收尸葬地藏寺北。吴云奉使时，会梁王遣铁知院等二十人使沙漠，为边将所获，帝乃释二十人，令与云俱行。至沙塘口，二十人谋曰：「吾等奉使不达，被执而还，罪必死。」乃说云令胡服编发，诈为元使。又偪令改制书，共给梁王。云不从，以死自誓，亦被害。梁王遣人收云骨，葬给孤独寺，及事闻，帝震怒，故有是役。【按：王祎字子充，浙江金华府义乌县人。建文时赐谥文节，永乐登极，凡建文设施尽革，遂削祎谥。后至正统中，义乌县丞刘杰奏请，加奉使云南死节臣恤典，祎赐谥文忠。吴云字友云，江苏常州府宜兴县人。至弘治中，赠谥忠节，并祀云南，勅赐为二忠祠。】是年冬十二月，明卒，叔世袭。明任职一年。

段世 宝之弟，明之叔

段（氏）〔世〕，明太祖壬戌洪武十五年袭。二月，世闻鄯阐破，梁王已死，又以沐英等兵略寻甸、临安、澄江、元江、楚雄、洱海，次第皆下，进偪大理，乃遣使致书，请依唐宋故事，奉正朔为外臣。友德不听，答书谕令速降。凡三致书，世怒，遂遣都使张元亨、州判李洪赴军前下战书。畧云：「鄯阐危甚登天，大理险倍投海。英如汉武，昔战仅置益州；雄若胡元，设官止于中庆。取之易而守之难，莫若依吾请乞册封，定为进贡，始为良策。吾实武人，不通经史，前代得失则履闻也。恭惟麾下振耀皇威，功不亚于孔明，才克比于方叔。滌山川之旧染，歴代所未有也。况吾与尔既无杀父之仇，又无财债之怨，无故交战，真乃不祥。尔屯威楚，彼处之民有何罪焉？若耗人之食，是绝其命；取人之财，是刳其心；摭人妻女，是乱人伦，则吾之应，不得已也。爰念尔等皆中国之人，其中岂无一二达士。得此何益？不得何损？西南之地，号为不毛，易动难安。今春气渐暄，烟瘴渐起，不须杀尔，四五月间，雨霖河泛，尔粮尽气敝，十散九死。形如鬼魅，色如黑漆，欲活不能，汝之进退狼狈矣。莫若乘此，天晴地干，早寻活路。宁作中原鬼，莫作边地魂，尔宜图之。后理国段明顿首。」书后继一诗云：「长驱虎旅势威宣，深入不毛取暴残。汉武故营旗影灭，唐宗遗垒角声寒。方今天下平犹易，自古云南守独难。拟欲华夷归一统，经纶度量必须寛。」友德、英等览书大怒，拘其使。左副将军蓝玉等

率师径进，兵至品甸，世恃田庵和尚有术，列兵五万扼下关。沐英自将攻之，不克。乃命王弼，率兵出洱水之东，趋上关，英以兵缀下关，为犄角势。别遣胡海洋将一军夜度，从石门间绕道出点苍山后，缘崖而上张旗帜。迟明，英先驱，渡河斩关而入，海洋之师亦从山而下，腹背夹攻。世众惊溃，拔其城，世就擒，并执明之二子苴仁、苴义，时二月二十三日也。于是沐英等分兵取鹤庆、丽江，破石门关，荡金齿，所有摩〔上此下夕〕、和泥、车里、品甸等部相率归附。又略建昌，故元平章月普帖木儿降。闰二月，赐云南各土官冠带及诰勅，使任本州岛知州等官。四月，乌撒、东川、芒部诸蛮复叛，溥友德、沐英会兵进讨，斩首三万余级，诸蛮来降，云南悉平。以乌撒、乌蒙、芒部地近四川，分隶之。九月，土官杨苴等叛，纠众至二十万，攻云南城。都督谢熊、指挥冯诚婴城固守。沐英自乌撒移兵讨之，斩首六万余级，擒四千余人，诸部悉定。洪武癸亥十六年二月，故元右丞普颜笃同土酋高大一作天惠叛，据佛光砦。【蔚按：佛光砦即佛光山，山半有洞，可容万人。又名一女关。昔诸葛武侯曾擒孟获于此。在大理府浪穹县东二十里。】也先不花叛，据邓川州。溥友德率郭英平之。又定蒙化州，过金沙江，攻北胜府，今永北厅。擒故元平章隔生。于是丽江府、拒津等州皆平，前后斩首一万三千级，蛮民降者四十万户。帝遣耿炳文谕溥友德、蓝玉等班师，沐英留镇云南，别命列侯王志、仇成、张龙分赴寻甸各府，缮城池，立屯堡，安辑人民。是年，械送世并明之二子苴仁、苴义赴京。世临行，以诗别故人杨朝彦云：「雄兵一日破重关，父子流离瞬息间。别后欲知相忆处，锦江流水彩潺潺。」洪武甲子十七年四月，溥友德等班师至京，论平云南功，进封溥友德为颖国公，胡海洋东川侯，陈桓普定侯，张翼鹤庆侯，蓝玉、仇成、王弼、张龙等并赐铁券，子孙世袭。吴复、金朝兴先卒，俱授世袭侯爵，铁券加禄并同。余升职赐金帛有差。以世、苴仁、苴义见帝，帝诛其头目，谕苴仁、苴义及世曰：「尔祖宝，昔年曾有降表，朕不忍废。」乃授苴仁官雁门卫镇抚，赐名归仁，苴义官武昌卫镇抚，赐名归义。世任职一年，段氏世土，至此而绝。帝又封其族段保为云龙州土知州。

按：段氏袭总管十二世，起南宋理宗辛酉景定二年，为蒙古世祖中统二年，讫明太祖壬戌洪武十五年，共一百二十二年。

### 南诏历代名宦

张元，汉元帝时守。张翕，东汉明帝时守。郑纯，同时。王追，东汉顺帝时守。王伉，后汉时永昌郡丞。吕凯，同时永昌郡功曹。前有文齐、吴霸、陈立，后有张亮、刘宠、犍为费诗，巴东马忠皆着勋绩。李毅，晋惠帝光熙元年为宁州刺史，政治明达，五苓夷反时病卒，其女秀有父才，领州事。至怀帝时赠少府谥威侯。王逊东，晋明帝大宁元年为晋宁守，华

夷畏服。夷叛，死之。州人以中子坚领州事，官至平西安南将军。

### 南诏历代乡贤附元朝进士

汉盛览，字长通，叶榆今大理府太和县。人，受学司马相如，着赋心四卷。同时叶榆张叔，天资奇颖，书过目成诵。俗不知学，叔每病之。闻司马相如至若水，【蔚按：『水经注』：若水南经云南郡之遂久县，县废，在今大理府宾川州城东北一百里，古称白门，置于汉时，今为金沙江巡检司地。】遂负笈往从之，受经归教乡人。 隗叔通，叶榆人，性至孝，母好飲江水，通日入江取水，维艰。滩水忽出平石，涉取甚便，人谓之孝子石。 东汉许叔，一作叔重。昆明人，明帝时入中国，受五经归，为本郡教授。 尹珍，字道真，平彝人，桓帝时入中国，负笈从许慎受经学，还教乡人。 唐尹仇寛，叶榆人，德宗贞元间为蒙氏清平官，入朝陈地图，贡方物，唐拜为左散骑常侍，封高溪郡侯。 张志成，昆明人，文宗太和间入蜀，学王羲之草书，归教国人。 元王升，昆明人，曲靖宣慰副使学政名时。 段文瑞，澄江人，读书尽孝，诏旌其门，仕至临安总管。 杨惠，楚雄人，孝母感神，诏旌其门。 张景云，昆明人，仕至临安经历。 陈宝，平彝人，仕至尚书。尹贡，南宁人，仕至尚书。以上三人皆德政名时。 元朝进士王楫、李近仁、段天祥、李天佑、李郁五人，皆三甲同进士出身。

### 南诏各种蛮夷【六十条。】

#### 白民

有阿白、白儿子、民家等名。白国之后，即滇中之土著。妇女出门，携伞障面，谓之避嫌。宴客，切肉拌蒜，名曰食生。余同汉人。女镶边衣，以银花银吊为饰。

#### 蒲人

即古百濮，周书所谓微卢彭濮也，后讹为蒲。质黑，鸟音。男子清布裹头，衣套头衣，膝系黑膝；妇人挽发为髻，脑后戴青绿磁珠，花布围腰，短裙，系海{贝巴}十数围。带刀弩长牌，不畏深渊，或浮以渡。婚娶长幼跳蹈，吹芦笙为孔雀舞，婿家立标竿，上悬彩绣荷包，中贮五谷银钱等者，两家男妇大小争缘取之，以得者为胜。又有野蒲、普蛮、朴子蛮等类，性尤凶{上一下凶}悍，男子以布二幅结于左肋，另用布一幅合缝挂身；〔女〕以红布搭右肩蔽腰以下。今顺宁府多此种。

#### 爨人

一名百夷，又名摆夷。性耐暑热，居多在棘下。本澜沧江外夷人。有水旱二种：水爨夷近水好浴，薙后发，蓄前发，盘髻如瓢，故又名瓢头爨夷；旱爨夷山居耕猎，又名汉爨夷。男青布裹头，簪花；妇女不施胭粉，自然白皙，盘

发辫，红绿包头，饰以五彩线须，衣五色衣，桶裙绣边。其俗贱女贵男，头目妻数百人，庶民亦数十，耕织贸易，皆妇人任之。凡婚娶，男女相悦而议聘，一成匹配，不肃而严。如夫妇不睦，听夫付之一物为凭，然后改适。有邪术，能使男子千里不忘，其法不外传也。

### 猓

爨蛮卢鹿之裔，猓其讹音也。以五月为春。信鬼尚巫，巫有大覈幡，拜禡白马之号。卜用雄鸡两髀骨，骨有细窍，刺以竹签，视多寡向背之势，定吉凶。其部长妻曰耐得，勇士曰苴可。每岁六月廿四日，名火把节，燃松炬，照村砦田庐。男椎髻镊须，耳环佩刀；妇披发短衣，桶裙，披羊皮。

### 白猓

一名撒马都，即西爨白蛮。知读书，能文字，舌音清便，多冒汉人。见尊长披羊皮，故嫁女授羊皮一帐。短衣革履，胸挂花包。妇人花衣桶裙，青布蒙头，饰以海贝、锡铃。

### 黑猓

即东爨乌蛮。其祝以铃，其占以草。男挽发贯耳，披毡佩刀；妇人贵者衣套头衣，方领如井字，无襟带，自头罩下，长曳地尺许，披黑羊皮，饰以铃索。

### 干猓

以山居得名。每食插筋饭中，仰天跪拜为报本。好勇喜斗，杀人偿以财。服饰同黑猓，妇人项挂一羊毛筐，行住纽毛为绵。以织毯。

### 海猓

一名坝猓，以种水田得名。盖土人以水为海，以平田为坝也。居家俭朴，知读书。（男）服饰如汉人，妇如白猓。

### 妙猓

多土官之裔，有营长、官奴、火头等称。男挽发贯耳；妇人桶裙无袴，穿套头衣，前不揜胫，后长曳地，衣边火焰，弯曲如旗尾。居茅舍，中堂作火炉，父子妇姑，围炉而卧。又有一种，戴鹊帽者，名猓落蛮；白布裹胫者，曰白脚猓。

### 葛猓

一名大头猓。男以青布丈许裹发为大头，女戴布花线箍。婚嫁步行，妇避伯，不避翁。亦有顶盔擐甲，乘马佩刀，以劫抢为生者。然居家尊卑有序，会食以跪为敬。

### 阿者猓

男女皆耳环手钏，衣短袴，披羊皮。婚娶，婿亲负女以归。



### 阿乌猓猓

性狡好猎。多蓄牛羊。每砦设官房一所，婚嫁并集其中。男短衣，女长衣，俱裹头，贯耳，出入带刀弩。

### 鲁屋猓猓

耕种射猎为生。男短衣木屐，女长裙跣足。

### 撒米猓猓

居山，耕瘠负薪，近水，捕鱼时给。面多黧黑，男挽发如髭，毛褐被毡，佩短刀。女披青布单，短裙，长袴。又有鲁兀、老乌、撒完、洒泥、阿蝎、阿系等类，衣饰风俗畧同。

### 老牯猓猓

即罗婺，又名罗午、罗武。男披发贯耳，披毡佩刀，穿火草布衣；女辫髮垂肩，饰以海贝砗磲，穿火草布裙。无床帟被褥，以松毛籍地而卧。

### 猓黑

蒲蛮别种。择丛篁深处，结茅而居。蜂虫鼠蛤，无所不食，以莽稗为上品。又有大猓黑、小猓黑，岩居野处，猿猓同类。

### 普特

以渔为业，舟不盈丈，而炊爨、牲畜、资生之具，无不咸备。泅水出没，口衔手捉，皆巨鱼也。今云南府省城西碧鸡山下，多有此种。

### 地羊鬼

亦僊人类也。短发黄睛，奸狡嗜利。与人相仇，能行妖术，以木石易人心肾，或以一帚系衣后，变形为象、马、猪、羊、猫、犬等物。稍畏惧之，即为所魅，入人腹中，食五脏，或潜至人家，偷窃财物，食婴儿。知者一手捉之，一手痛殴，必复为人，夺其帚糜之，彼必以家赀之半勾脱。或有娶其女者，夫每出，必问归期，即饵以毒，如期而归，更以药解，否则毒发而死。交易失信，及私窥其要女者，必毒之。此种元江州为甚。

### 窝泥

有和泥、（干）〔斡〕泥、哈泥、路弼等名。黑白两种，风俗畧同。男戴麦杆帽，穿火草布衣，耳环，跣足；妇女辫发数绺，海贝、杂珠，盘旋为髻，套衣桶裙。善养猪，其猪小耳短身，长不过三十觔，肉肥腩，名窝泥猪。婚用媒妁，路遇野兽，则返而他求。嫁则以红藤束膝为识。勤生畜用，每积贝一百二十索为一窖，临死嘱其子曰：「积贝若干，汝取某窖，余留我为来生用。」死则以雌雄鸡各一殉。又有一种名糯比，与此同，其生者名哥泥，亦名瓦黑，好勇尚斗，能咒人使病。

### 阿昌

一名峨昌。男短衣披布单，女长衣无袴，腰缠红藤。占用竹三十三枝，畧如筮仪。嗜酒，觅禽兽虫豸生啖之。旧俗兄死弟妻嫂，后有罗拔砮百夫长早正死，其妻方艾自誓不失节，饿而死，其风遂革。又有小阿昌，其俗畧同。

#### 阿成

男短衣，女桶裙，以树皮代瓦。婚用牛羊，至女家以水泼女足为定。

#### 比苴

僂夷别种。男耳环革屐，女白帔束发，缠迭如仰螺。构楼而居近水，极寒犹浴。丧尚緋，夫死，妻不再嫁，名曰鬼妻。又有白布缠足者，名白脚僂夷，亦名孔苔；茜齿，文身，髡者，名光头僂夷；额上黥刺月牙纹，盖习车里之俗，所谓雕题也。

#### 黑舖

亦名黑普，俗同窝泥，形容黧黑，怕见汉人。畜山羊，作竹器，一切床几欂栳，备极精巧。

#### 黑干夷

男椎髻麻衣，耳环垂肩；女以毛褐细带，编如筛罩，首饰以海贝、碎磬，衣领亦然。婚配，男吹芦笙，女弹口琴，唱和调悦，先野合，后媒妁。

#### 山苏

男披发跣足，女椎髻蒙头。语似鸟音，形如猿猴。潜居深山，种莽、麻，或工或猎，夷中之最苦者。

#### 车苏

亦名扯苏，傍岩临水。男短衣皮履，女长裙无袴。种莽稗，绩线为业，以羊毛占（晴）〔晴〕雨。

#### 喇鸡

亦名喇记。黑布帽白衫。好楼居，孟春作土主会，客至，掘鼠及虾蟆为敬。其在交趾者，男善鎗，女善弩，多充交兵。又有白喇鸡，男女俱穿五色氍毹，食山虫、水蛇等物。

#### 喇五

亦曰喇乌，又曰喇鲁。男如摆夷，女如窝泥，构楼临水而居。上人下畜，名曰掌房。其在腾越州者，食巨蟒、毒虫，或取蜂糟食之。

#### 獠喇

男插鸡毛，女裹首巾，皆披羊皮，不浣濯。婚配先野合。每采蒙肚花【蒙肚花树皮如藓，能毒人。生景东厅，今不产矣。】欲人醉死则醉采，欲人狂死则狂采，以毒人。又一种在王弄山者，名马喇

#### 哈喇

男女黑色，不知盥栉。妇女红黑藤缠腰数十围，产子以竹兜盛之，负于肩。又有古喇、杜喇，色尤甚，言语不通，略似人形而已。

#### 戛喇

{上一下凶} 悍好猎，居山巔，户不正出，迎山开门，不留余粟。

#### 卡喇

亦曰卡腊，男穿耳挽发，佩短刀；女短衣无袴，胫着彩色折袴。聚族而居，耕种鬻薪。

#### 卡隋

亦名卡高，性顽钝，喜歌舞。男女多野合。婚娶通媒妁之日，议聘金，多至数百。娶后子孙犹有代祖父偿聘金者。

#### 卡瓦

多在顺宁、永昌二郡，辣蒜江外。貌（{酉己}）{丑}性恶，猎人以祭。商贾出腾越州，入木邦者必经其地，呼为卡利瓦。有生熟二种，生者劫掠，熟者保路。

#### 西番

即土番，亦名巴苴，居金沙江边。性悍戾，善弩，男女辫发百络，不知栉沐。男以藤缠左肘，披琵琶毡，暑热不脱；女以海贝砗磲磁珠饰于项。又有野西番，更不可制。

#### 古宗

一名狢狢，西番别种。皆辫发百络，男戴红缨，穿氍毹，挂铜铃佩刀，女饰以珊瑚、银泡，披腊瓦被单，皆穿乌拉鞢。经年一栉，栉必牲祭。春夏种荞稗，秋冬赶牛马，取牛羊乳酥，调油茶而食，名曰馓{食巴}。又有小古宗，喜猎饮酒，余畧同。

#### 苦葱

面丑。男麻衣短袴，女短衣桶裙，亦有衣袴相连者。耕山采蕨为生。所佩环手籐，自幼至老不释，死以殉。

#### 摩{上此下夕}

乌蛮别种。性淳朴，鸟音，男薙发戴帽，长领布衣；女高髻，或戴黑漆尖帽，短衣长裙。畜牛羊，产射香。同类仇杀，妇女登场一劝即止。岁暮杀牛羊相邀，一客不至为耻。今有读书入泮者。

#### 力{上此下夕}

即{犛栗}{犛栗}。衣麻，披毡，岩居穴处。利刀毒矢，刻不离身，登山捷若猿猱。以土和蜜充饥，得野兽即生食。尤善弩，每令其妇负小木盾前行，自后射之，中盾而不伤妇，以此制服西番。野力{上此下夕}披发插羽，尤

{上一下凶} 悍。

遮 {上此下夕}

男女皆穿耳，挽发。喜华彩衣，盘旋蔽体。每飲食必精洁。而长于弓弩，尤善鸟铳。

羯 {上此下夕} {子

自孟养流入。环眼鸟队，散发，缠藤，耳带大环，首插鸡羽，无衣袴，腹下以麻布一幅围之。负弩佩刀，喊声如犬。又有结 {上此下夕}，耳带象牙大环，红布围头，衣半身衫，袒右臂，亦其类也。

拇鸡

亦作 {豸母} {豸几}。形丑恶，妇女尤甚。椎髻插羽，佩刀负弩。猎食猿狙。见人有蓄，思盗，先用鸡骨卜，吉则往，否则止。

摩察

亦名木察。束发耳环，披毡佩刀，执木弩、药矢，猎取禽兽。妇人皂布蒙头，饰以海贝，长裙细折，多至二十余幅，前后无衩，名曰桶裙。

嫚且

男女皆麻衣袴，披羊皮，以（丑）〔五〕月为正月。性好飲，男女皆同。男吹芦笙，女弹口琴，欢飲竟月，过此则终岁忍饥，野菜充腹而已。

土人

（思）〔男〕絮袄佩刀弩，女披毡束皮索，饥则紧缚之。婚姻以刀甲为聘，披发见舅姑。有争者告天，沸汤投物，以手捉之，曲则糜烂，直者无恙。

侬人

侬智高部落之裔。男束发短衣，女短衣密扣，腰缠红裹肚。性 {上一下凶} 狡，漆齿，出入佩刀，长技在铳。

沙人

越析夷也，又名蒙嵩。男辫发长衣，女以挑花白布蒙头，腰围红布。出入佩刀，耕田、射猎，所居掌房。丧服用红，祭肉弃不食。又有黑沙人，白沙人。聘用牛，既婚之夕，男女不同室，及回女家，有娠方归。

{豸票} 人

男束发披毡，女短衣露腹，缠红藤，腰系沙罗布裙，上短下长，男女同耕。

狛人

男缠头跣足，女青布缠头，畧如僧帽，缀以海贝，彩布衣裙，着大尖鞋。构楼而居，甘犬嗜鼠。又有罗缅、麦岔、迭吗、喇毛等类，顽良不一，衣饰风俗畧同。

## 怒人

居永昌怒江内外。其江深险，四序皆燠，赤地生烟。每二月瘴气腾空，两堤草头交结不开，名交头瘴。男子面多黄瘦，刚狠好杀猎，或采黄连为生，鲜及中寿。妇人披发红藤勒首。每年贡鹿皮二十张、山驴皮十张、黄蜡八十觔、麻布三十度，以代赋税。

## { 彘 求 } 人

丽江府鹤庆州大雪山外。男女披发，树叶为衣，耳穿七孔，坠以木环。与怒人接壤，畏怒人，不敢越界。

## 野人

永昌界外。居无室庐，宿于树巅。赤发黄睛，首戴骨圈，插雉羽，手足腹皆缠红藤，以幅布或树皮揜下体。勾刀大刀，捕禽兽蛇虫，生食之。逢人即杀。

## 老挝

南掌国夷类。戴藤篾黑漆帽，宽二尺许，短衣无袴，用杂色布一疋，从膝下兜绕，围结胸前，名打抄子。妇女耳贯大黑漆圈，塞以野花。

## 列密

即利米。刀耕火种，精射猎，得鼠雀生噉之。男篾帽皂衣，女辫发赤足。出外披花布，以蔽其身。

## 喇嘛

丽江、鹤庆多有之。来自西藏，招本境摩{上此下夕}为徒。有红黄二教，红弱黄强。毡帽褊衫，各如其色。

## 苗子

三苗之后，有九种，黔省最多，流入滇中者，惟仲家花苗而已。束发耳环，未婚者缚楮皮于额，或插鸡毛。女布冠套头衣，桶裙，皆用五彩桃花布为之。每岁孟春跳月，男吹芦笙，女振铃唱和，并肩舞蹈，终日不倦。或以彩为球，视所欢者掷之，暮则同归，比晓乃散，然后议婚。节序击铜鼓，吹呐叭，聚赛神，书契惟数目字，及六十花甲子同，余不同。

## 土獠

其属本在黔、蜀、粤西之交，流入滇中。男首裹青布，白衣领缀红布一方，妇人冠红巾，衣花绣。性粗笨，好蛊魔之术，其虫夜飞如星，光芒摇曳，射入窗棂，触者病。

## 交人

安南国之类。男箬笠蕉扇，衣裳楚楚；女面貌颇雅，手贯牙钏，长衣长裙，以红帕蒙头，皆辫发鞞鞋。读诗书习礼，仪婚丧之事，俱仿中国。

## 缅人

缅甸国流入者。有老缅、阿瓦、猛别、雍会、普干、摆古、得楞子等类。长于鸟铳，其火药用麦面傅之，迅疾无声。又有缅目者，称为莽纪，断发文身，漆齿穿耳，鳞衣跣足，头带红缎一方，性喜花草。

总计段氏大理、后理二国，传二十二世，共三百零十五年。